



舊五代史卷一百二十三

宋薛居正等撰

周書第十四

列傳三

高行周字尚質幽州人也生於媯州懷戎軍之鵬窠里曾祖順厲  
 世戍懷戎父思繼昆仲三人俱雄豪有武幹聲馳朔塞唐武皇之  
 平幽州也表劉仁恭為帥仍留兵以戍之以思繼兄為先鋒都將  
 媯州刺史思繼為中軍都將順州刺史思繼弟為後軍都將昆仲  
 分掌燕兵部下士伍皆山北之豪也仁恭深憚之武皇將歸私讓  
 仁恭曰高先鋒兄弟勢傾州府為燕患者必此族也宜善壽之久  
 之太原戍軍恣橫思繼兄弟制之以法所殺者多太祖怒詔讓仁  
 恭乃訴以高氏兄弟遂併遇害仁恭因以先鋒子行珪為牙將諸

行周下通性考異引在宗室  
錄作行溫

子竝列帳下厚撫之以慰其心時行周十餘歲亦補職在仁恭左右行珪別有傳在唐書及莊宗收燕以行周隸明宗帳下常與唐末帝分率牙兵明宗征燕率其下擁從鄉人趙德鈞謂明宗曰行周心甚謹厚必享貴位梁將劉鄩之據莘也與太原軍對壘旦夕轉鬪常一日兩軍成列元行欽爲敵軍追躡劍中其面血戰未解行周以麾下精騎突陣解之行欽獲免莊宗方寵行欽召行周撫諭賞勞而欲置之帳下又念于明宗帳下已奪行欽更取行周恐傷其意密令人以利祿誘之行周辭曰總管用人亦爲國家事總管猶事王也余家昆仲脫難再生承總管之厚恩忍背之乎及兩軍屯于河上覘知梁軍自汴入楊村寨明宗晨至斗門設伏將邀之眾寡不敵反爲所乘時牙稍叢萃勢甚危蹙行周聞之出騎橫擊梁軍遂得解去明宗之襲鄆州也行周爲前鋒會夜分澍兩人

無進志行周曰此天贊也彼必無備是夜涉河入東城北曙平之莊宗平河南累加檢校太保領端州刺史同光末出守絳州明宗卽位特深委遇天成中從王晏球圍定州敗王都擒懿緒皆有功賊平遷潁州團練使長興初以北邊隘契丹用爲振武節度使明年以河西用軍移鎮延安清泰初改潞州節度使晉祖建義于太原唐末帝命張敬達征之行周與符彥卿爲左右排陣使契丹主入援太原也行周彥卿引騎拒之尋爲契丹所敗遂與敬達保晉安若累月救軍不至楊光遠欲圖敬達行周知之引壯士護之敬達性慝不知其營護謂人曰行周每踵余後其意何也繇是不復敢然敬達遂爲光遠所害晉祖入洛令行周還藩加同平章事晉祖都汴以行周爲西京留守未幾移鄴都晉祖幸鄴會安從進叛命行周爲襄州行營都部署明年秋平定漢南晉少帝嗣位加兼

侍中移鎮睢陽開運初從幸澶淵拒敵于河上車駕還京代景延  
 廣為侍衛親軍都指揮使移鄆州節度使時李彥韜為侍衛都虞  
 候可否在已行周雖典禁兵心遊事外退朝歸第門宇翛然賓友  
 過從但引滿而已尋改歸德軍節度使以李守貞代掌兵柄許行  
 周歸藩晉軍降于中渡也少帝命行周與符彥卿同守澶州契丹  
 入汴召赴京師會草寇攻宋州急遣行周歸鎮宋史高懷德傳杜重威降  
 契丹京東諸州羣盜大起  
 及契丹主死于樂城契丹將蕭翰立許王李從  
 益知南朝軍國事遣死士召行周辭之以疾退謂人曰衰世難輔  
 況兒戲乎漢高祖入汴加守太傅兼中書令代李守貞為天平節  
 度使杜重威據鄴叛漢祖以行周為招討使總兵討之鄴平授鄴  
 都留守加守太尉進爵臨清王乾祐中人觀加守太師進封鄴王  
 復授天平節鉞改封齊王太祖踐阼加守尚書令增食邑至一萬

勿本三

七千戶太祖以行周耆年宿將賜詔不名但呼王位而已慕容彥  
 超據兗叛太祖親征奉迎輿駕傾家載贄奉觴進俎率以身先太  
 祖待之逾厚廣順二年秋以疾薨于位享年六十八贈賻加等冊  
 贈尚書令追封秦王諡曰武懿子懷德皇朝駙馬都尉宋州節度  
 使宋史太祖本紀一五八千一百三十三

安審琦字國瑞其先沙陁部人也祖山盛朔州牢城都校贈太傅  
 父金全安北都護振武軍節度使累贈太師唐書有傳審琦性驍  
 果善騎射幼以良家子事莊宗為義真軍使遷本軍指揮使天成  
 初唐末帝由潞邸出鎮河中奏審琦為牙兵都校未幾入為歸化  
 指揮使王師伐蜀充行營馬軍都指揮使及凱旋改龍武右廂都  
 校領富州刺史清泰初為捧聖指揮使領順化軍節度使其年鎮  
 邢州兼北面行營排軍陣使從張敬達圍太原及楊光遠舉晉安

勿本三

寨降于晉祖審琦亦預焉晉祖踐阼加檢校太傅同平章事充天  
平軍節度使兼侍衛馬步軍都指揮使旋以母喪起復天福三年  
就加檢校太尉尋改晉昌軍節度使京兆尹七年移鎮河中晉少  
帝嗣位加檢校太師開運末朝廷以契丹八寇以審琦爲北面行  
營馬軍左右廂都指揮使與諸將會兵于洛州俄而敵騎大至時  
皇甫遇慕容彥超亦預其行乃率所部兵與敵戰于安陽河上時  
遇馬爲流矢所中勢已危蹙諸將相顧莫有敢救者審琦謂首將  
張從恩曰皇甫遇等未至必爲敵騎所圍若不急救則爲擒矣從  
恩曰敵勢甚盛無以枝梧將軍獨往何益審琦曰成敗命也若不  
濟與之俱死假令失此二將何面目以見天子遂率鐵騎北渡敵  
見塵起謂救兵至乃引去遂救遇與彥超而還晉少帝嘉之加兼  
侍中移鎮許州未幾移鎮兗海漢有天下授襄州節度使兼中書

令屬荆人叛命潛遣舟師數千屠襄郢審琦禦之而遁朝廷賞功  
就加守太保進封齊國公歲餘又加守太傅國初封南陽王顯德  
初進封陳王世宗嗣位加守太尉三年拜章請覲優詔許之加守  
太師增食邑至一萬五百戶食實封二千三百戶審琦鎮襄河僅  
一紀嚴而不殘威而不暴故南邦之民甚懷其惠五年移平盧軍  
節度使承認赴鎮因朝于京師世宗以國之元老禮遇甚厚車駕  
親幸其第以寵之六年正月七日夜爲其隸人安友進安萬合所  
害時年六十三初友進與審琦之愛妾私通有年數矣其妾常慮  
事泄見誅因與友進謀害審琦友進甚有難色其妾曰爾若不從  
我當反告友進乃許之至是夕審琦沈醉寢于帳中其妾乃取審  
琦所枕劍與友進友進猶惶駭不敢判及遽召其黨安萬合便殺  
審琦既而慮事泄乃引其帳下數妓盡殺以滅其跡不數日友進

郡守下 五代史補 安審琦 未詳  
氏凡片言 俾信有邑 不問 梓 意  
及後 齊州也 一旦 亡 安 忽 有 此 不  
德 持 錫 且 上 朕 奉 審 琦 怒 連 此 在  
傳 安 姓 不 詳 誰 步 而 向 國 家 之 中 國 審  
所 依 劍 逐 之 將 及 而 咸 仁 國 錫 錫 錫  
法 入 王 臥 在 審 琦 營 櫓 之 際 有 一 蒼  
頭 報 曰 國 夫 人 生 之 矣 得 此 也 則 錫 錫  
者 乎 風 骨 之 曰 傳 亦 不 安 守 忠 也 自  
在 審 琦 指 一 信 矣

等竟敗悉爲子守忠嚮而戮之世宗聞之震悼輟視朝三日詔贈  
尚書令追封齊王守忠仕皇朝累爲郡守

安審暉字明遠審琦之兄也起家自長直軍使轉外衙左廂軍使  
從莊宗平幽薊戰山東定河南皆預其功同光中授蔚州刺史天  
成中改汝州防禦副使歷鳳翔徐州節度副使河東行軍司馬晉  
高祖龍飛以霸府上僚授振武兵馬留後遷河陽節度使不踰月  
移鎮鄜州丁內艱起復視事五年李金全據安州叛詔馬全節爲  
都部署領兵討之以審暉爲副安陸平移鎮鄧州進位檢校太傅  
六年冬襄州安從進叛舉漢南之眾北攻南陽南陽素無城壁唯  
守衙城賊傅城下審暉登陴召賊帥以讓之從進不克而退襄州  
平就加檢校太尉少帝嗣位加檢校太師罷鎮授右羽林統軍歲  
餘出鎮上黨屬契丹內侵授邢州節度使居無何目疾暴作上章

求代歸于京師養疾累年太祖卽位召于內殿從容顧問尤所歎  
重將以祿起之審暉辭以暮齒願就頤養拜太子太師致仕封魯  
國公累食邑五千戶實封四百戶廣順二年春卒年六十三廢朝  
二日詔贈侍中諡曰靜子守鑄仕皇朝爲贊善大夫

宋史卷一百一十四

安審信字行光審琦之從父兄也父金祐世爲沙陁部偏裨名聞  
邊塞審信習騎射從父金全天成初爲振武節度使補爲牙將俄  
而兄審通爲滄州節度使用爲衙內都虞候歷同陝許三州馬步  
軍都指揮使晉祖起義于太原唐末帝命張敬達以兵攻之而審  
信率先以部下兵遁入并州晉祖以其故人得之甚悅其妻與二  
子在京師皆爲唐末帝所戮但貸其老母而已契丹旣降晉安審  
晉高祖以審信爲汾州刺史檢校太保充馬步軍副部署晉祖入  
洛授河州節度使檢校太尉同平章事審信性旣翻覆率多疑忌

在蒲中時每王人告諭騎從稍多必潛設備以防其圖己尋歷許  
兗州鎮所至以聚斂爲務民甚苦之會朝廷謀大舉北伐凡藩侯  
皆預將帥以審信爲馬步軍右廂都排陣使俄改華州節度使漢  
初移鎮同州入爲左衛上將軍國初轉右金吾上將軍三年夏四  
月太祖御乾元殿入閣審信不赴班位爲御史所彈詔釋之時審  
信久病精神恍惚聞臺司奏劾揚言曰趨朝偶晚未是大過何用  
彈舉我終進奉二萬緡盡逐此乞索兒輩未幾以病請退授太子  
太師致仕是歲秋卒年六十贈侍中諡曰成穆

宋史大業美一第八千一百四十四

李從敏字叔達唐明宗之猶子也沈厚寡言善騎射多計數初莊  
宗召見試弓馬用爲衙內馬軍指揮使從平汴洛補帳前都指揮  
使遷捧聖都將明宗移鎮真定表爲成德軍馬步軍都指揮使從  
明宗入洛補皇城使出爲陝府節度使王都據定州叛命王晏球

爲招討使率師討之以從敏爲副領滄州節度使王都平移授定

州尋代范延光爲成德軍節度使加檢校太尉封涇玉鎮州有市

人劉方遇家富于財方遇卒無子妻弟田令遵者幼爲方遇治財

善殖貨劉族乃共推令遵爲方遇子親族共立券書以爲誓信累

年後方遇二女取資于令遵不如意乃訟令遵冒姓奪父家財從

敏令判官陸浣鞫其獄而殺令遵

北夢瑣言云鎮州市人劉方遇家財數十萬方遇妻田氏蚤卒田之妹爲尼常出入方遇家方

遇使尼長髮爲繼室有田令遵者方遇之妻弟也善貨殖方遇以所積財令令遵與殖殖馬方遇有子年幼二女皆嫁方遇疾卒子幼不能督家業方遇妻及二女以家財素爲令遵與殖殖乃聚族合謀請以令遵姓劉爲方遇繼嗣即令鬻券人安美爲親族請鬻券書既定乃遣令遵服斬衰居喪而二女初立令遵時先邀每月供財二萬及後求取無厭而石李二女夫使二女請本府論訴云令遵冒姓奪父家財令遵下獄石李二夫族與本府要吏親黨上至府帥判官行軍司馬隨使都押衙各受方遇二女賂錢數千緡而以令遵與姊及書券安美同情共盜俱棄市人知其冤

令遵父詣臺訴冤詔本州節度副使符蒙掌書記徐台符鞫之備

明姦狀及詰二女伏行賂于節度使趙環代判高知柔觀察判官

陸浣竝捕下獄具服贓罪事連從敏甚懼乃命其妻赴洛陽入宮

告王淑妃明宗知之怒曰朕用從敏爲節度使而在法殺人我羞見百官又令新婦奔赴不須見吾面時王淑妃頗庇護之趙環等三人竟棄市從敏等止于罰俸而已北夢瑣言從敏初欲削官中宮哀所竟罰一年俸長興初移鎮宋州唐末帝起兵于鳳翔其子重吉爲亳州防禦使從敏承朝廷命害之清泰中從敏與洋州從璋並罷歸策待之甚薄嘗宮中同飲既醉末帝謂從璋從敏曰爾等何物處雄藩大鎮二人懼賴曹太后見之叱曰官家醉爾輩速出去方得解晉祖革命降封莒國公再領陝州尋移鎮上黨入爲右龍武統軍出爲河陽節度使漢祖入汴移授西京留守累官檢校太師同平章事隱帝卽位就加兼侍中改封秦國公歲餘以王守恩代還廣順元年春以疾卒年五十四詔贈中書令諡曰恭惠永樂大典卷二万三千五百九鄭仁誨字日新晉陽人父霸累贈太子太師仁誨幼事唐驍將陳

紹光恃勇使酒嘗乘醉抽佩劍將刺刃于仁誨左右無不奔避唯仁誨端立以俟畧無懼色紹光因擲劍于地謂仁誨曰汝有此器度必當享人間富貴及紹光典郡仁誨累爲右職後退歸鄉里以色養爲樂漢高祖之鎮河東也太祖累就其策與之燕語每有質問無不以正理爲答太祖深器之漢有天下太祖初領樞務卽召爲從職及太祖西征嘗密贊軍機西師凱旋累遷至檢校吏部尙書太祖踐阼旌佐命功授檢校司空客省使兼大內都點檢恩州團練使尋爲樞密副使踰年轉宣徽北院使右衛大將軍出鎮澶淵轉檢校太保入爲樞密使加同平章事世宗之北征也以仁誨爲東京留守調發軍須供億無闕車駕迴加兼侍中尋丁內艱未幾起復顯德二年冬疾亟世宗幸其第親加撫問歔歔久之及卒世宗親臨其喪哭踰數舉是時世宗將行近臣奏云歲道非便不





此汝管取一啣飯處叔干拜謝而退俄授鎮國軍節度使漢初遇代歸京自以嘗附幕庭居常愧惕久之授太子太師致仕尋請告歸洛廣順二年冬卒年七十二詔贈侍中

宋史卷一百一十四

宋彥筠雍邱人也初隸滑州軍梁氏與莊宗夾河之戰彥筠時爲戰棹都指揮使以勞遷開封府牙校莊宗有天下擢領禁軍伐蜀之役率所部從康延孝爲前鋒蜀平歷維渝二州刺史明宗在位連典數郡晉初自汝州防禦使討安從進于襄陽以功拜鄧州節度使累官至檢校太尉未幾歷晉陝二鎮晉少帝嗣位再領鄧州尋移鎮河中漢初授太子太師致仕國初拜左衛上將軍世宗嗣位復爲太子太師致仕顯德四年冬卒于西京之私第輟視朝一日詔贈侍中初彥筠入成都據一甲第第中資貨鉅萬妓女數十輩盡爲其所有一旦與其主母微忿遽擊殺之自後常有所睹彥

仍本注准

筠心不自安乃修浮屠法以禳之因而溺志于釋氏其後每歲至金仙入涅之日常衣斬纓號慟于其像前其佞佛也如是家有侍婢數十人皆令削髮披緇以待左右大爲當時所誚又性好貨殖能圖什一之利良田甲第相望于郡國將終以伊洛之間田莊十數區上進竝籍于官焉

宋史卷一百一十四

史臣曰近代領戎藩列王爵祿厚而君子不議望重而人主不疑能自晦于飲酌之間保功名于始終之際如行周之比者幾何人哉奕世藩翰固亦宜然審琦有分閩之勞乏御家之道鋒摧玉折蓋不幸也其餘雖擁戎旃未聞閩政固不足與文召龔黃爲比也

舊五代史卷一百二十三

舊五代史卷一百二十三攷證

周列傳三高行周傳 行周通鑑攷異引莊宗實錄作行溫是書

唐紀尙仍實錄之舊

鄭仁誨傳太祖踐阼旌佐命功授檢校司空客省使 案歐陽史云漢興周太祖爲樞密使乃召仁誨用之累官至內客省使太祖入立以仁誨爲大內都巡檢據此傳仁誨仕周始爲客省使與歐陽史異

張彥成傳 案通鑑攷異彥成本名彥威避周祖諱故改託諾舊作禿餒今改

舊五代史卷一百二十三攷證

舊五代史卷一百二十四

宋薛居正等撰

周書第十五

列傳四

王殷瀛州人曾祖昌裔本州別駕祖光滄州教練使因家焉唐末幽滄大亂殷父咸珪避地南遷因投于魏軍殷自言生于魏州之開元寺既長從軍漸為偏將唐同光末為華州馬步軍副使因家于華下天成中移授靈武都指揮使久之代還清秦中張令昭據鄴叛殷從范延光討之首冒矢石率先登城以功授邠州刺史尋改原州殷性謙謹好禮事母以孝聞每與人結交違從皆先稟于母母命不從殷必不往雖在軍旅交遊不雜及為刺史政事小有不佳母察之立殷于庭詰責而杖之

歐陽史殷為刺史政事有小失母責之殷即取杖授婢僕自答于母前

晉

人下界法易失作大名人

天福中丁內艱尋有詔起復授憲州刺史殷上章辭曰臣爲末將  
出處無損益于國家臣本燕人值鄉國離亂少罹偏罰因母鞠養  
訓導方得成人不忍遽釋苴麻遠離廬墓伏願許臣終母喪紀晉  
高祖嘉而許之晉少帝嗣位會殷服闋召典禁軍累遷奉國右廂  
都指揮使漢祖受命從討杜重威于鄴下殷與劉詞皆率先力戰  
矢中于首久之出折鏃于口中以是漢祖嘉之乾祐末遷侍衛步  
軍都指揮使領夔州節度使會契丹寇邊遣殷領兵屯澶州及李  
業等作亂漢隱帝密詔澶帥李洪義遣圖殷洪義懼不克反以變  
告殷殷與洪義同遣人至鄴請太祖赴內難殷從平京師授侍衛  
親軍都指揮使太祖卽位授天雄軍節度使加同平章事典軍如  
故殷赴鎮以待衛司局從凡河北征鎮有戎兵處咸稟殷節制又  
于民間多方聚斂太祖聞而惡之因使宣諭曰朕離鄴時帑廩所

鈔本  
列傳

儲不少卿與國家同體隨要取給何患無財三年夏太祖征兗還  
殷迎謁于路宴賜而去及王峻得罪太祖遣其子飛龍使承誨往  
謁令口諭峻之過惡以慰其心三年秋以永壽節上表請覲太祖  
雖允其請且慮殷之不誠尋遣使止之何福進在鎮州素惡殷之  
太橫福進入朝摭其陰事以奏之太祖遂疑之是年冬以郊禋有  
日殷自鎮入覲太祖令依舊內外巡警殷出入部從不下數百人  
又以儀形魁偉觀者無不聳然一日遽入奏曰郊禮在近兵民大  
集臣城外防警請量給甲仗以備非常太祖難之時中外以太祖  
嬰疾步履稍難多不視朝俯逼郊禋殷有震主之勢頗憂之太祖  
乃力疾坐于滋德殿殷入起居卽命執之尋降制流竄及出都城  
遽殺之眾情乃安是歲春末鄴城寺寺鐘懸絕而落又火光出幡  
竿之上殷之人覲也都人餞于離亭上馬失鐙翻墮于地人訝其

不祥果及于禍太祖尋令澶帥鄭仁誨赴鄴殷次子爲衙內指揮使不候謁仁誨誅之遷其家屬于登州

宋史太祖本紀卷八十四

何福進字善長太原人父神劔累贈左驍衛大將軍福進少從軍以驍勇聞唐同光末郭從謙以兵圍莊宗于大內福進時爲宿衛軍校獨出死力拒戰于內後明宗知而嘉之擢爲奉聖軍校出爲磁州刺史充北面行營先鋒都校清泰中自彰聖都虞候率本軍從范延光平鄴以功歷鄆隴二州防禦使開運中由潁州團練使入拜左驍衛大將軍屬契丹陷中原令中朝文武臣寮凡數十人隨帳北歸時福進預其行次鎮州聞北主已斃其黨尙據鎮陽遂與李筠白再榮之儔合謀力戰盡逐契丹據有鎮陽時漢祖已建號于河東詔以福進爲北面行營馬步都虞候尋拜曹州防禦使檢校太保太祖出鎮于鄴將謀北伐奏以福進自隨及太祖入

初本有三字

佐下案以爲史作長劍指揮使

平內難以輔佐功拜忠武軍節度使不數月移領鎮州數年之間北鄙無事及聞太祖將有事于南郊拜章入覲改天平軍節度使加同平章事未及之任卒于東京之私第年六十有六時顯德元年正月也累贈中書令子繼筠仕皇朝領建武軍節度使卒

宋史太祖本紀卷八十四

劉詞字好謙元城人梁貞明中事故鄴帥楊師厚以勇悍聞唐莊

宗入魏亦列于麾下兩河之戰無不預焉同光初爲効節軍使轉

劔直指揮使尋以忤于權臣出爲汝州小校凡留滯十餘年清泰

初詔諸道選驍果以實禁衛由是得人典禁軍晉初從侯益收汜

水關佐楊光遠平鄴都累遷奉國第一軍都虞候後從馬全節伐

安陸敗淮賊萬餘眾晉祖嘉之授奉國都校累加檢校司空又從

杜重威敗安重榮于宗城及圍鎮陽詞自登雲梯身先士伍以功

加檢校司徒沁州刺史時王師方討襄陽尋命詞兼行營都虞候

襄陽平遷本州團練使在郡歲餘臨事之暇必被甲枕戈而臥人或問之詞曰我以勇敢而登貴仕不可一日而忘本也若信其溫飽則筋力有怠將來何以報國也及漢有天下復為奉國右廂都校遙領閬州防禦使從太祖平鄴加檢校太保乾祐初李守貞叛于河中太祖征之朝廷以為侍衛步軍都指揮使遙領寧江軍節度使充行營馬步都虞候命分屯于河西二年正月守貞遣敢死之士數千夜入其營皆怖懼不知所為惟詞神氣自若令于軍中曰此小盜耳不足驚也遂免胄橫戈叱短兵以擊之賊眾大敗而退自是守貞喪膽不復有奔突之意河中平太祖嘉之表其功為華州節度使歲餘移鎮邢臺太祖受命加同平章事三年秋改鎮河陽顯德初世宗親征劉崇詞奉命領所部兵隨駕行及高平南遇樊愛能等自北退迥且言官軍已敗止詞不行詞不聽疾驅而

今下卷改易史作侍中據薛史則詞一侍中贈中書令非贈侍中也疑此為史誤

北世宗聞而嘉之尋命為隨駕都部署又授河東道行營副部署其年夏車駕還京授永興軍節度使加兼侍中行京兆尹二年冬以疾卒于鎮年六十有五贈中書令諡曰忠惠詞發身軍校亟歷戎事常以忠勇自負洎領藩鎮能靖恭為治無苛政以撓民諡以忠惠議者韙之子延欽仕皇朝為控鶴廂使

亦世宗受命九十九

王進幽州良鄉人少落魄不事生業為人勇悍走及奔馬嘗聚黨為盜封境患之符彥超為河朔郡守以賂誘置之左右長興初彥超鎮安州屬部曲王希全構亂軍州令進齋變狀聞于朝廷明宗賞其捷足詔隸于軍中洎契丹內寇戰于膠河進獨追擒六十七人時漢祖總侍衛親軍知其驍果擢為馬前親校漢祖鎮河東或邊上警急令進齋封章達于闕下自并至汴不六七日復焉由是恩撫頗厚繼任戎職累遷至奉國軍都指揮使從太祖入平內難

晉州下平陽易史元世宗  
虎挂都督樣使每時史吳

以功遷虎捷右廂都指揮使歷汝鄭防禦使亦有政聲俄授相州節度使為政之道頓減于前議者惜之顯德元年秋以疾卒于任贈檢校太師

永樂七年庚子年三月二十三日

史彥超雲州人也性驍獷有膽氣累功至龍捷都指揮使太祖之赴內難彥超以本軍從國初與虎捷都指揮使何徽成晉州會劉崇與契丹入寇攻圍州城月餘是時本州無帥知州王萬敢不協物情彥超與何徽協力固拒累挫敵鋒攻擊日急禦捍有備軍政甚嚴居人無擾及朝廷遣樞密使王峻總兵為援敵兵宵遁太祖嘉其善守之功賞賜甚厚未幾授龍捷右廂都指揮使尋授鄭州防禦使劉崇之寇潞州也車駕親征以彥超為先鋒都指揮使高平之戰先登陷陣以功授華州節度使先鋒如故大軍至河東城下契丹營于忻代之間遙應賊勢詔天雄軍節度使符彥卿率諸

鈔本家

將屯忻州以拒之彥卿襲契丹于忻口彥超以先鋒軍追蕃兵離大軍稍遠賊兵伏發為賊所陷世宗痛惜久之詔贈太師不加等也仍命優卹其家焉

亦崇七年庚子年三月二十三日

鈔本寇

鈔本考

史懿字繼美代郡人也本名犯太祖廟諱故改焉父建瑋事唐莊字為先鋒都校唐書有傳莊宗之伐鎮陽時建瑋為流矢所中而卒懿時年甫弱冠莊宗以其父歿于王事召拜昭德軍使俄遷先鋒左右廂都校俾嗣其家聲天成中為涿州刺史晉初由趙州刺史遷洛州團練使尋歷毫鳳二州防禦使晉祖以其弟翰尚晉國長公主故尤所注意天福中授彰武軍節度觀察留後開運初歷澶貝二鎮節度使三年移鎮涇原未幾契丹入中原時四方征鎮為契丹所召者靡不磨至惟懿堅壁拒命仍送款于漢祖漢有天

舊五代史

卷一百一十四

五



兼侍中進封邠國公顯德元年春以抱病歸朝

東都事畧楊廷璋傳周太祖常論廷璋圖涇帥史懿

廷璋屏左右示以詔書懿受代入朝遂免禍

途經洛卒于其第年六十三贈中書令

懿受代入朝遂免禍

王令温字順之瀛州河間人也父迪德州刺史累贈太子太師令温少以武勇稱初隸唐莊宗麾下稍遷廳直軍校明宗之為統帥嘗與契丹戰于上谷明宗臨陣馬逸為敵所迫令温乃以所乘馬授明宗而自力戰飛矢連發敵兵為之稍卻及明宗即位歷遷神武彰聖都校晉初自淄州刺史遷洛州團練使及安重榮稱兵于鎮州晉祖以令温為行營馬軍都指揮使與都帥杜重威敗賊于宗城以功授亳州防禦使尋拜永清軍節度使屬契丹來寇時令温奉詔入朝契丹遂陷貝州其家屬因沒于契丹晉少帝憫之授武勝軍節度使未幾移鎮延州又遷靈武漢有天下復為永清軍節度使尋改安州國初加檢校太尉同平章事世宗嗣位遷鎮安

軍節度使罷鎮歸闕顯德二年夏以疾卒時年六十有二詔贈侍

中

周密字德峯應州神武川人也初事後唐武皇為軍職莊宗之平常山明宗之襲汶陽密皆從征有功莊宗平梁授鎮州馬軍都指揮使明宗即位累遷河東馬步軍副都指揮使晉天福初除冀州刺史累官至檢校司徒人為右羽林統軍檢校太保四年秋授保大軍節度使檢校太傅屬部民作亂密討平之尋移鎮晉州加檢校太尉開運中人拜右龍武統軍三年秋出鎮延州其年冬契丹陷中原延州軍亂立高允權為帥時密據東城允權據西城相拒久之會漢高祖建義于太原遣使安撫密乃棄其城奔于太原隨漢祖歸汴久居于闕下廣順初授太子太師致仕顯德元年春卒時年七十五長子銳仕皇朝為內職次子廣歷諸衛大將軍

書五代史 卷一百一十五 列傳

李懷忠字光孝太原晉陽人父海本府軍校懷忠形質魁壯初事唐莊宗隸于保衛軍夾城之役懷忠率先登城以功補本軍副兵馬使莊宗平定山東累遷保衛軍使天成中歷陝府許州滄州都指揮使遙領辰州刺史清泰初以河西蕃部寇鈇命懷忠屯方渠晉祖受命以懷忠故人召典禁兵三遷護聖左右廂都指揮使遙領壽州節度使檢校太保未幾爲同州節度使檢校太傅少帝嗣位入爲右羽林統軍改左武衛上將軍廣順中以太子太傅致仕三年夏卒年六十六詔贈太子太師

此書本與卷一百一十四

白文珂字德溫太原人也會祖辯父君成遼州刺史文珂初事後唐武皇補河東牙將改遼州副使莊宗嗣位轉振武都指揮使天成中鎮州節度使王建立表爲本州馬步軍都指揮使遙授舒州刺史檢校司空歷青州魏府都指揮使歷瀛蔚忻代四州刺史領

代州日兼蕃漢馬步都部署漢高祖鎮并門表爲副留守檢校太保漢國初建授河中節度使西南面招討使檢校太傅漢祖定兩京改天平軍節度使加同平章事未幾鎮陝州檢校太師會河中李守貞叛詔充河中府行營都部署時文珂已老朝議恐非守貞之敵乃命太祖西征河中平文珂授西京留守河南尹太祖踐阼加兼中書令頃之以太子太師致仕世宗卽位封晉國公顯德元年卒于西京年七十九輟視朝一日子廷誨仕皇朝歷諸衛將軍

此書本與卷一百一十四

白延遇字希望太原人也幼畜于晉之公宮年十三從晉祖伐蜀以趨悍見稱晉有天下歷典禁軍累遷至檢校司空天福中晉祖在鄴安重榮叛于鎮州帥眾數萬詣闕而來晉祖命杜重威統諸將以禦之時延遇不預其行乃泣告晉祖願以身先許之及陣于

宗城延遇率其屬先犯之斬級數十戰既酣而劍亦折諸將由是推伏晉祖聞之即命中使以寶劍良馬賜之常山平以功授檢校司徒充馬軍左廂都校後出爲汾州刺史遷復州防禦使國初加檢校太保尋受代歸闕屬太祖親征兗海以延遇爲先鋒都校兗州平授齊州防禦使歲餘改兗州防禦使在兗二年爲政有聞人甚安之州民數百詣闕乞立德政碑以頌其美顯德二年冬世宗命宰臣李穀爲淮南道軍都部署乃詔延遇爲先鋒都校三年春帥其所部與韓令坤先入揚州軍聲甚振尋命以別部屯于盛唐前後敗淮賊萬餘眾四年夏世宗迴自壽春制以延遇爲同州節度使未赴任復命帥眾南征是年冬以疾卒于濠州城下詔贈太尉

唐書卷一百一十五

唐景思秦州人也幼以屠狗爲業善角觝戲初事僞蜀爲軍校唐

同光中莊宗命魏王繼岌帥師伐蜀時景思以所部戍于固鎮首以其城降于繼岌乃授興州刺史爲貝州行軍司馬屬契丹攻其城因陷于幕庭趙延壽素知其名令隸于帳下署爲所部壕砦使開運末契丹據中原以景思爲亳州防禦使領事之日會草寇數萬攻圍其城景思悉力以拒之後數日城陷景思挺身而出使人言于隣郡得援軍數百逐其草寇復有其城亳民賴是以濟漢初改授鄧州行軍司馬常鬱鬱不得志後受代歸闕乾祐中命景思爲沿淮巡檢使屢挫淮賊時史宏肇淫刑贖貨多織羅南北富商殺之奪其財大開告密之門景思部下有僕夫希求無厭雖委曲待之不滿其心一日拂衣而去見宏肇言景思受淮南厚賂私貯器械欲爲內應宏肇即令親吏率三十騎往收之告者謂收吏曰景思多力十夫之敵也見便殺之不然則無及矣收騎至景思迎

接有欲擒之者景思以兩手抱之大呼曰冤哉景思何罪設若有罪死亦非晚何不容披雪公等皆丈夫安忍如此都將命釋之引告者面證景思言受淮南賂景思曰我從人家人並在此若有十緡貯積亦是受賂言我貯甲仗除官賜外有一事亦是私貯使者搜索其家惟衣一笥軍籍糧簿而已乃寬之景思曰使但械繫送我入京先是景思別有紀綱王知權者在京聞景思被誣乃見史宏肇曰唐景思赤心爲國某服事三十年孝于父母義于朋友被此誣罔何以伸陳某請先下獄願公追劾景思免至冤橫宏肇愍之令在獄日與酒食景思既桎梏就路潁亳之人隨至京師眾保證之宏肇乃令鞠告事者具伏誣陷卽斬之遂奏釋景思顯德初河東劉崇帥眾來寇世宗親總六師以禦之及陣于高平景思于世宗馬前距踴數四且曰願賜臣堅甲一領以觀臣之效用世宗

抄本詳

由是知其名因以高平陣所得降軍數千人署爲効順指揮命景思董之使于淮上三年春世宗親征淮甸景思繼有戰功乃命遙領饒州刺史未幾改授濠州行刺史令帥眾攻圍濠州四年冬因力戰爲賊鋒所傷數日而卒世宗甚憫之詔贈武清軍節度使史臣曰自古爲人臣者望重則必危功崇則難保自非賢者疇能免之況王鄴帥昧明哲之規周太祖乃雄猜之主欲無及禍其可得乎自福進而下皆將帥之英也擁旌作翰諒亦宜然惟彥超以捍寇而沒可不謂忠乎

永老下典夫八千三百七十一

舊五代史卷一百二十四

舊五代史卷一百二十四攷證

周列傳四王殷傳瀛州人 案歐陽史作大名人

劉詞傳轉劔直指揮使 案歐陽史作長劔指揮使

贈中書令 案歐陽史作贈侍中據是書則詞以兼侍中贈中書

令非贈侍中也疑歐史誤

史彥超傳與虎捷都指揮使何徵戍晉州 案歐陽史作彥超遷

虎捷都指揮使與是書異

史懿傳本名犯太祖廟諱故改焉 案本名二句疑爲後人竄入

攷懿名匡懿避宋太祖御名故去匡字薛史成于開寶六年不

應豫稱爲太祖或係宋人讀是書者附注于後遂混入正文也

舊五代史卷一百二十四攷證

舊五代史卷一百二十五

宋 薛 居 正 等 撰

周書第十六

列傳五

趙暉字重光澶州人也弱冠以驍果應募始隸于莊宗帳前與大梁兵經百餘戰以功遷馬直軍使同光中從魏王破蜀命暉分統所部南戍蠻陬明宗即位徵還授禁軍指揮使晉有天下參掌衛兵從馬全節圍安陸佐杜重威戰宗城皆有功改奉國指揮使開運末以部兵屯于陝屬契丹入汴慨然有憤激之意及聞漢祖建義于并門乃與部將王晏侯章戮力叶謀逐契丹所命官屬據有陝州卽時馳騎聞于漢祖通鑑契丹主賜趙暉詔卽以爲保義留後暉漢祖乃契丹使者焚其詔遣使使河間趙矩奉表賀命暉爲保義軍節度陝虢等州觀察處置等使漢祖之幸東京路

出于陝暉戎服朝于路左手控六飛達于行宮君臣之義如舊結  
焉旋加檢校太尉乾祐初移鎮鳳翔加同平章事屬王景崇叛據  
岐山及期不受代朝廷即命暉為西南面行營都部署統兵以討  
之時李守貞叛于蒲趙思綰據于雍與景崇皆遞相為援又引蜀  
軍出自大散關勢不可遏暉領兵數千數戰而勝然後塹而圍之  
暉屢使人挑戰賊終不出乃潛使千餘人于南城一舍之外擐甲  
執兵偽為蜀兵旗幟循南山而下詐令諸軍聲言川軍至矣須臾  
西南塵起城中以為信乃令數千人潰圍而出以為應援暉設伏  
而待一鼓而盡殪之自是景崇膽破不復敢出明年春拔之加檢  
校太保兼侍中國初就加兼中書令三年春拜章請觀詔從之入  
朝授歸德軍節度使顯德元年受代歸闕以疾告老授太子太師  
致仕進封秦國公尋卒于其第年六十七制贈尚書令

宋史卷一百九十一

王守恩字保信太原人父建立潞州節度使封韓王晉書有傳守  
恩以門蔭幼為內職遷懷衛二州刺史後歷諸衛將軍開運末契  
丹陷中原守恩時因假告歸于潞時潞州節度使張從恩懼契丹  
之盛將朝于契丹以守恩婚家甚倚信之乃移牒守恩請權為巡  
檢使從恩既去守恩以潞城歸于漢祖仍盡取從恩之家財通鑑云  
副使趙行遷知留後牒守恩權巡檢使與高防佐之高防與守恩謀遣指揮使李萬超白晝率眾  
大譟斬趙行遷推守恩權知昭義留後守恩殺契丹使者舉鎮來降宋史李萬超傳云張從恩將  
棄城歸契丹會前驍衛將軍王守恩服喪私第從恩即委以後事遁去及契丹使至專領郡務守  
恩遂無所預萬超奮然謂其部下曰我輩垂餌虎口苟延旦夕之命今欲殺使保其城非止逃生  
亦足建勳業汝曹能乎眾皆躍然喜曰敢不唯命遂率所部大譟入府署殺其使推守恩為帥列  
狀以聞漢祖從其請乃命史宏肇統兵先渡河至潞見萬超語之曰收復此州公之力也吾欲殺  
守恩以公為帥可乎萬超對曰殺契丹使以推守恩為帥漢祖即命守恩為昭義軍  
稷計耳今若賊害于人自取其利非宿心也漢祖大奇之漢祖即以守恩為昭義軍  
節度使漢有天下移鎮邠寧加同平章事乾祐初遷永興軍節度  
使時趙思綰已據長安乃改授西京留守守恩性貪鄙委任羣小  
以掊斂為務雖病廢殘癯者亦不免其稅率人甚苦之洛都嘗有

宋史卷一百九十一 列傳

豪士為二姓之會守恩乃與伶人數輩夜造自為賀客因獲白數  
笏而退太祖迴自河中駐軍于洛陽詔以白文珂代之守恩甚懼  
而洛人有曾為守恩非理割剝者皆就其第徵其舊物守恩一一  
償之及赴闕止奉朝請而已乾祐末既殺史宏肇等漢少帝召羣  
臣上殿以諭之時守恩越班而颺言曰陛下今日始睡覺矣其出  
言鄙俚如此國初授左衛上將軍顯德初改右金吾衛上將軍封  
許國公二年冬昇疾歸洛而卒五代史補周高祖為樞密鳳翔永興河中三鎮反高祖帶職出討之迴戈路由洛陽時王守恩為留守以使其相自專乘檐子迎高祖于郊外高祖遙見大怒且疾驅入于公館久之始令人傳旨託以方浴守恩不知其怒但安坐俟久時白文珂在高祖麾下召而謂曰王守恩乘檐子俟吾誠無稽也安可人為留守汝宜急去代之文珂不敢違于是即時禮上頌之吏馳去報守恩曰白侍中受樞密命為留守詔守恩大驚奔馬而歸但見家屬數百口皆被逐于通衢中百姓莫不聚觀其亦有乘便號叫索取貨錢物者高祖使吏籍其數立命償之家財為之一空朝廷悚然不甚為理

孔知濟字秀川徐州滕縣人故太子太師致仕勅之猶子也父延  
緘左武衛大將軍致仕年九十餘卒知濟仕梁為天興軍使同光

末勅鎮昭義時莊宗用唐朝故事以黃門為監軍皆恃恩暴橫節  
將不能制明宗鄴城之變諸鎮多殺監軍時監潞者懼誅欲誘鎮  
兵謀變知潛伏甲于室凌晨監軍來謁執而殺之軍城遂寧明宗  
嘉之洎勅罷鎮以知潛為澤州刺史入為左驍衛大將軍長興清  
泰中歷唐復成三郡刺史晉高祖即位用為奉國右廂都指揮使  
領舒州刺史從征范延光于鄴遷宿州團練使俄改隴州防禦使  
開運中移刺鳳州累官至檢校太傅河池據關防之要密邇邛蜀  
兵少勢孤知潛撫士得宜人皆盡力故西疆無牧圉之失契丹主  
稱制署滑州節度使漢祖受命自鎮入朝隱帝嗣位授密州防禦  
使踰歲以疾受代歸朝廣順三年冬卒于京師五代史補宋一五八十一百三十三

王繼宏冀州南宮人少嘗為盜攻剽閭里為吏所拘械繫于鎮州  
獄會赦免死配隸本軍時明宗作鎮致之麾下晉高祖為明宗將



署爲帳中小校天福中爲六軍副使性負氣不遜禁中與同列忿  
爭出配義州軍歲餘爲奉國指揮使從契丹主至相州遂令以本  
軍戍守契丹主留高唐英爲相州節度使唐英善待繼宏每候其  
第則升堂拜繼宏之母贈遺甚厚倚若親戚又給以兵仗畧無猜  
忌會契丹主死漢祖趨洛唐英遣使歸款漢祖大悅將厚待唐英  
使未迴繼宏與指揮使樊暉等共殺唐英繼宏自稱留後令判官  
張易奉表于漢祖人或責以見利忘義繼宏曰吾儕小人也若不  
因利乘便以求富貴畢世以來未可得志也及漢祖征杜重威至  
德清軍繼宏來朝乃正授節旄是歲就加檢校太傅節度判官張  
易每見繼宏不法必切言之繼宏以爲輕已乾祐中因事誣奏殺  
之尋又害觀察推官張制漢末移鎮貝州就加檢校太尉廣順初  
加同平章事二月六日移鎮河陽會永壽節入覲遇疾卒于京師

詔贈侍中子永昌仕皇朝歷內諸司使

永昌七世孫二千八百五十一

馮暉魏州人也始爲効節軍士拳勇騎射行伍憚之初事楊師厚  
爲隊長唐莊宗入魏以銀槍効節爲親軍與梁人對壘河上暉以  
犒給稍薄因竄入南軍梁將王彥章寘之麾下莊宗平河南暉首  
罪赦之從明宗征潞州誅楊立有功又從魏王繼岌伐蜀蜀平授  
夔州刺史時荊州高季興叛以兵攻其城暉拒之屢敗荆軍長興  
中爲興州刺史以乾渠爲治所會兩川叛蜀人來侵暉以眾寡不  
敵奔歸鳳翔朝廷怒其失守詔于同州衙職安置未幾從晉高祖  
討蜀蜀人守劔門領部下兵踰越險阻從他道出于劔門之左掩  
擊之殺守兵殆盡會晉祖班師朝廷以暉爲澶州刺史晉天福初  
范延光據鄴叛以暉爲馬步都將孫銳爲監軍自六明鎮渡河將  
襲滑臺尋爲官軍所敗暉退歸鄴爲延光城守明年秋暉因出戰

而降授滑州節度使檢校太傅鄴平移鎮靈武初張希崇鎮靈州  
以久在蕃疆頗究邊事數年之間侵盜並息希崇卒未有主帥蕃  
部寇鈔無復畏憚朝廷以暉強暴之名聞于遐徼故以命之及暉  
到鎮大張宴席酒殺豐備部眾告醉爭陳獻賀暉皆以錦綵酬之  
蕃情大悅党項拓拔彥昭者州界部族之大者暉至來謁厚加待  
遇仍為治第豐其服玩因留之不令歸部河西羊馬由是易為交  
市暉期年得馬五千匹而蕃部歸心朝議患之隆平集藥元福傳西戎三  
族攻靈州命元福佐朔方  
節度使馮暉討之朔方距威州七百里地無水草謂之旱海攜糧至暉食盡詰朝行四十里而敵  
騎數萬扼要路暉大懼遣人致賂求成雖許及日中猶未決暉曰奈何元福曰彼正欲困我耳察  
其勢敵雖眾特依西山而陣者其精兵也請以驍銳先  
薄西山彼或少怯常舉黃旗為識暉善其謀斬賊殆盡晉開運初桑維翰輔政欲圖  
大舉以制北方命將佐十五人皆列藩之帥也惟暉不預其數乃  
上章自陳且言未老可用而制書見遣詔報云非制書忽忘實以  
朔方重地蕃部窺邊非卿雄名何以彈壓比欲移卿內地受代亦

須奇才暉得詔甚喜又達情乞移鎮邠州即以節旄授之行未及  
邠又除陝州暉獻馬千匹馳五百頭在陝未幾除侍衛步軍都指  
揮使兼領河陽即以王令溫為靈武節度使暉既典禁兵兼領近  
鎮為朝廷縻留頗悔離靈武及馮玉李彥韜用事暉善奉之未幾  
復以暉為朔方節度使加檢校太師漢高祖革命就加同平章事  
隱帝嗣位加兼侍中國初加中書令封陳留王廣順三年夏病卒  
年六十追贈衛王子繼業朔方衙內都虞候暉亡三軍請知軍府  
事因授檢校太保充朔方兵馬留後皇朝乾德中移于內地命為  
同州節度使

永泰大典卷一第百一十三

高允權延州人祖懷遷本郡牙將懷遷生二子長曰萬興次曰萬  
金梁唐之間為延州節度使卒于鎮允權即萬金子也雖出于將  
門不嫻武藝起家為義川主簿歷膚施縣令罷秩歸延州之策晉

開運末以周密爲延帥延有東西二城其中限以深澗及契丹人  
汴一日州兵亂攻密密固守東城亂兵既無帥亦無敢爲帥者或  
曰取高家西宅即君爲帥可也是夜未曙允權方寢亂軍排闥請  
知留後事遂居于西城與密相拒數日河東遣供奉官陳光惠宣  
撫河西允權乃遣支使李彬奉表太原周密棄東城而去漢祖遣  
使就加允權檢校太傅仍正授旄鉞漢祖入汴允權屢修貢奉隱  
帝卽位加檢校太尉同平章事允權與夏州李彝興不協其年李  
守貞據河中叛密構彝興爲援及朝廷用兵夏州軍逼延州允權  
上章論列彝興亦紛然自訴朝廷賜詔和解之太子太師致仕劉  
景巖舊事高氏爲牙校亦嘗爲延帥甚得民心景巖以允權婚家  
後輩心輕之允權恒忌其強是歲冬盡殺景巖之家收其家財萬  
計以謀叛聞朝廷不能辨關西賊平方面例覃恩命就加允權檢

校太師太祖卽位加兼侍中廣順二年春卒其子紹基匿喪久之  
又擅主軍政欲邀承襲觀察判官李彬以爲不可當聽朝旨紹基  
與羣小等惡其異議乃殺彬給奏云彬接構內外謀殺都指揮使  
及行軍副使自據城池已誅戮訖其妻子及諸房骨肉尋令捕繫  
次太祖聞之詔並釋之仍令都送汝州安置後朝廷令六宅使張  
仁謙往巡檢紹基乃發喪以聞輟視朝兩日

宋史卷五十五

折從阮字可久本名從遠避漢高祖舊名下一字故改爲代家雲  
中父嗣倫爲麟州刺史累贈太子太師從阮性溫厚弱冠居父喪  
以孝聞唐莊宗初有河朔之地以代北諸部屢爲邊患起從阮爲  
河東牙將領府州副使同光中授府州刺史長興初入朝明宗以  
從阮洞習邊事加檢校工部尙書復授府州刺史晉高祖起義以  
契丹有援立之恩賂以雲中河西之地從阮由是以郡北屬旣而

契丹欲盡徙河西之民以實遼東人心大擾從阮因保險拒之晉少帝嗣位北絕邊好乃遣使持詔諭從阮令出師明年春從阮率兵深入邊界連拔十餘砦開運初加檢校太保遷本州團練使其年兼領朔州刺史安北都護振武軍節度使契丹西南面行營馬步都虞候漢祖建號晉陽引兵南下從阮率眾歸之尋升府爲永安軍析振武之勝州並沿河五鎮以隸焉授從阮光祿大夫檢校太尉永安軍節度府勝等州觀察處置等使仍賜功臣名號乾祐元年加特進檢校太師明年春從阮舉族入覲朝廷命其子德展爲府州團練使授從阮武勝節度使太祖受命加同平章事尋移鎮滑州又改陝州二年冬授靜難軍節度使世宗卽位就加兼侍中以年老上章請代優詔許之顯德二年冬赴闕行次西京以疾卒時年六十四制贈中書令

亦崇大史卷一百八十一百三十三

王饒字受益慶州華池人也父柔以饒貴累贈太尉饒沈毅有才幹始事晉高祖天福初授控鶴軍使稍遷奉國軍校累加檢校尚書左僕射六年從杜重威平常山以功加檢校司空遷本軍都校領鄆州刺史時安從進叛于襄陽晉祖命高行周率兵討之以饒爲行營步軍都指揮使賊平授深州刺史逾年復入爲奉國都校加檢校司徒領欽州刺史未幾改本軍右廂都指揮使領閬州團練使晉末契丹據中原漢祖建義于晉陽尋克復諸夏惟常山郡爲契丹所據時饒在其郡乃與李筠白再榮之儔承間竊發盡逐其黨漢祖嘉之授鄜州觀察留後加光祿大夫賜爵開國侯復移授鎮國軍節度使加檢校太傅國初就加同平章事賜推誠奉義翊戴功臣顯德初以郊丘禮畢加檢校太尉移鎮貝州世宗嗣位加兼侍中改彰德軍節度使滿歲受代入奉朝請顯德四年冬以

疾卒于東京之私第年五十九追封集國公饒性寬厚體貌詳雅  
所莅藩鎮民皆便之每接賓佐必怡聲緩氣恂恂如也故士君子  
亦以此多之

亦安在也卷六十五

孫方諫鄭州清苑縣人也本名方簡廣順初以犯廟諱故改焉定  
州西北二百里有狼山山上有堡邊人賴之以避剽掠之患因中  
置佛舍有尼深意者俗姓孫氏主其事以香火之教聚其徒聲言  
覓不壞因復以衣襟瞻禮信奉有同其生方諫即其宗人也嗣行  
其教率眾不食葷茹其黨推之為若主晉開運初定帥表為邊界  
遊奕使

宋史

孫行友傳方諫懼主帥捕逐乃表歸朝因置為東北面招收指揮使且賜院額曰勝福每拜丹軍來必率其徒襲擊之鎧仗畜產所得漸多人益依以避難焉易定帥聞

于朝因以方諫為邊界遊奕使行友副之自是捍禦多

所殺獲乘勝入鄆溝關平庸城破飛狐塞拜丹頗畏之求請多端因少不得志潛通

于契丹拜丹之入中原也以方諫為定州節度使尋以其將耶律  
忠代之改方諫雲州節度使方諫恚憤與其黨歸狼山不受拜丹

位相不  
易州刺史行義秦州刺史  
先特用以居定州入法後用  
四十視一十五時

命漢初契丹墮定州城壘燒熱廬舍盡驅居民而北中山為之一  
空方諫自狼山率其部眾迴保定州上表請命漢祖嘉之即授以  
節鉞累官至使相太祖受命加兼侍中未幾改華州節度使朝廷  
以其弟行友為定州留後

宋史云行友上言偵得拜丹離合願得勁兵三千乘間平定幽州乃移方諫鎮華州以行友為定州留後

又以弟議為德州刺史兄弟子姪職內廷者凡數人世宗嗣位史彥超

代之車駕駐蹕于并門方諫自華覲于行在從大駕南巡以疾就

醫于洛下尋授同州節度使加兼中書令未及赴任以疾卒于洛

陽年六十二輟視朝兩日詔贈太師其弟行友繼為定州節度皇

朝乾德中以其妖妄惑眾詔毀狼山佛寺遷其尼朽骨赴京遣焚

于北郊以行友為諸衛大將軍自是祇徒遂息焉

續通鑑長編建隆二年八月義成節度使同平

章事孫行友在鎮逾八年而狼山妖尼深意黨益盛上初即位行友不自安累表乞解官歸山上不許行友懼乃繕治甲兵將棄其帑還據山寨以叛兵馬都監樂繼能密奏其事上遣開門副使武懷節馳騎會鎮趙之兵偽稱巡邊直入定州行友不之覺既而出詔示之令舉族歸朝行友倉皇聽命既至命侍御史李維岳即訊得實已西制削奪行友官爵禁錮私策取尼深意尸焚之都

舊五代史卷一百二十五  
城西北隅行友弟易州刺史方進姪  
保塞軍使全暉皆詣闕待罪詔釋之

西六日午箭

史臣曰昔晉之季也敵騎長驅中原無主漢祖雖思拯溺未果圖  
南趙暉首變陝郊同扶義舉漢之興也暉有力焉命以作藩斯無  
媿矣守恩乘時効順雖有可觀好利殘民夫何足貴允權方諫因  
版蕩之世竊屏翰之權比夫畫雲臺之功臣何相去之遠也  
宋史大史  
卷三十五  
百六十一

舊五代史卷一百二十五

舊五代史卷一百二十五攷證

周列傳五高允權傳祖懷遷

懷遷原本作懷遠今據歐陽史改

正

孫方諫傳又以弟議為德州刺史

弟議宋史作行義

舊五代史卷一百二十五攷證

舊五代史

卷一百二十五 攷證

舊五代史卷一百二十六

宋薛居正等撰

周書第十七

列傳六

馮道字可道瀛州景城人其先爲農爲儒不恒其業道少純厚好學善屬文不恥惡衣食負米奉親之外惟以披誦吟諷爲事雖大雪擁戶凝塵滿席湛如也天祐中劉守光署爲幽州掾守光引兵伐中山訪于僚屬道常以利害箴之守光怒寘于獄中尋爲人所救免守光敗遁歸太原監軍使張承業辟爲本院巡官承業重其文章履行甚見待遇時有周玄豹者善人倫鑒與道不洽謂承業曰馮生無前程公不可過用時河東記室盧質聞之曰我曾見杜黃裳司空寫眞圖道之狀貌酷類焉將來必副大用玄豹之言不

足信也承業尋薦為霸府從事俄署太原掌書記時莊宗併有河  
北文翰甚繁一以委之莊宗與梁軍夾河對壘一日郭崇韜以諸  
校伴食數多主者不辦請少罷減莊宗怒曰孤為効命者設食都  
不自由其河北三鎮令三軍別擇一人為帥孤請歸太原以避賢  
路遽命道對面草詞將示其眾道執筆久之莊宗正色促焉道徐  
起對曰道所掌筆硯敢不供職今大王屢集大功方平南寇崇韜  
所諫未至過當阻拒之則可不可以向來之言誼動羣議敵人若  
知謂大王君臣之不和矣幸熟而思之則天下幸甚也俄而崇韜  
入謝因道為之解焉人始重其膽量莊宗即位鄴宮除省郎充翰  
林學士自綠衣賜紫梁平遷中書舍人戶部侍郎丁父憂持服于  
景城談苑道聞父喪即徒步見星以遇歲餘所得俸餘悉賑于鄉里道之所  
居惟蓬茨而已凡牧宰饋遺斗粟匹帛無所受焉時契丹方盛素

仍本三

聞道名欲掠而取之會邊人有備獲免明宗入洛遽謂近臣安重  
誨曰先帝時馮道郎中何在重誨曰近除翰林學士明宗曰此人  
朕素諳委甚好宰相俄拜端明殿學士端明之號自道始也未幾  
遷中書侍郎刑部尚書平章事凡孤寒士子抱才業素知識者皆  
與引用唐末衣冠履行浮躁者必抑而鎮之有工部侍郎任贊因  
班退與同列戲道于後曰若急行必遺下兔園策道尋知之召贊  
謂曰兔園策皆名儒所集道能諷之中朝士子止看文場秀句便  
為舉業皆竊取公卿何淺狹之甚耶贊大愧焉歐陽史云兔園策者鄉校  
俚儒教田夫牧子之所誦  
也北夢瑣言云兔園策乃徐庾文體非鄙樸之談但家藏一本人多賤之困學紀聞云兔園策府  
三十卷唐蔣王惲令僚佐杜嗣先做應科目策自設問附引經史為訓注惲太宗子故用梁王兔  
園名其書馮道  
兔園策謂此也復有梁朝宰臣李琪每以文章自擅曾進賀平中山王  
都表云復真定之逆城道讓琪曰昨來收復定州非真定也琪昧  
于地理頓至折角其後百僚上明宗檄號凡三章道自為之其文

仍本三



渾然非流俗之體舉朝服焉道尤長于篇詠秉筆則成典麗之外  
義含古道必爲遠近傳寫故漸具其高深由是班行肅然無澆漓  
之態繼改門下侍郎戶部吏部尙書集賢殿藝文館大學士加尙  
書左僕射封始平郡公一日道因上謁既退明宗顧謂侍臣曰馮  
道性純儉頃在德勝寨居一茅菴與從人同器食臥則芻藁一束  
其心晏如也及以父憂退歸鄉里自耕樵採與農夫雜處畧不以  
素貴介懷眞士大夫也天成長興中天下屢稔朝廷無事明宗每  
御延英留道訪以外事道曰陛下以至德承天天以有年表瑞更  
在日慎一日以答天心臣每記在先皇霸府日會奉使中山徑井  
徑之險憂馬有蹶失不敢怠于銜轡及至平地則無復持控果爲  
馬所顛仆幾至于損臣所陳雖小可以喻大陛下勿以清晏豐熟  
便縱逸樂兢兢業業臣之望也明宗深然之他日又問道曰天下

雖熟百姓得濟否道曰穀貴餓農穀賤傷農此常理也臣憶得近  
代有舉子聶夷中傷田家詩云二月賣新絲五月糶秋穀醫得眼  
下瘡剗卻心頭肉我願君王心化作光明燭不照綺羅筵偏照逃  
亡屋明宗曰此詩甚好遽命侍臣錄下每自諷之道之發言簡正  
善于裨益非常人所能及也時以諸經舛繆與同列李愚委學官  
田敏等取西京鄭覃所刊石經彫爲印版流布天下後進賴之明  
宗崩唐末帝嗣位以道爲山陵使禮畢出鎮同州循故事也道爲  
政閒澹獄市無撓一日有上介胡饒本出軍吏性麤獷因事詬道  
于牙門左右數報不應道曰此必醉耳因召人開尊設食盡夕而  
起無撓愠之色未幾入爲司空及晉祖入洛以道爲首相二年契  
丹遣使加徽號于晉祖晉祖亦獻徽號于契丹謂道曰此行非卿  
不可道無難色晉祖又曰卿官崇德重不可深入沙漠道曰陛下

受北朝恩臣受陛下恩存何不可

談苑云道與諸相歸中書食訖外廳堂吏前白道言北使事吏人色變手戰道取紙一幅

契丹主欲郊迎其臣曰天子無迎宰相之禮因止焉其名動遠俗

也如此

談苑云契丹賜其臣牙笏及臘日賜牛頭者為殊禮道皆得之作詩以紀曰牛頭偏得賜象笏更容持契丹主甚喜遂潛諭留道曰南朝為子孫豈有分別哉道在契

丹凡得所賜悉以市薪炭徵其意云北地苦寒老年所不堪當為之備若將久留者契丹感其意乃遣歸道三上表乞留固遣乃去猶更住館中月餘既行所至留駐凡兩月方出境左右語道曰

當北土得生還恨無羽翼公獨宿留何也道曰縱急還彼以筋脚馬一及還朝廷廢樞密

使依唐朝故事並歸中書其院印付道事無巨細悉以歸之尋加

司徒兼侍中進魯國公晉祖曾以用兵事問道道曰陛下歷試諸

艱創成大業神武睿畧為天下所知討伐不庭須從獨斷臣本自

書生為陛下在中書守歷代成規不敢有一毫之失也臣在明宗

朝曾以戎事問臣臣亦以斯言答之晉祖頗可其說道嘗上表求

退晉祖不之覽先遣鄭王就省謂曰卿來日不出朕當親行請卿

道不得已出焉當時寵遇無與為此晉少帝即位加守太尉進封

燕國公道嘗問朝中熟客曰道之在政事堂人有何說客曰是非

相半道曰凡人同者為是不同為非而非道者十恐有九昔仲尼

聖人也猶為叔孫武叔所毀况道之虛薄者乎然道之所持始終

不易後有人問道于少帝曰道好平時宰相無以濟其艱難如禪

僧不可呼鷹耳由是出道為同州節度使歲餘移鎮南陽加中書

令契丹入汴道自襄鄧召入契丹主從容問曰天下百姓如何可

救道曰此時百姓佛再出救不得惟皇帝救得其後衣冠不至傷

夷皆道與趙延壽陰護之所至也是歲三月隨契丹北行與晉室

公卿俱抵常山俄而北主卒永康王代統其眾及北去留其族嘉

聖以據常山時漢軍憤激因共逐出嘉聖尋復其城道率同列四

出按撫因事從宜各安其所人或推其功道曰儒臣何能為皆諸

聖下舊作解里今改正

何本何有

何本殊

何本殊  
補本本  
道五下  
乃服日二  
十三字

何本殊

何本殊

將之力也道以德重人所取則乃為眾擇諸將之勤宿者以騎校  
 白再榮權為其帥軍民由是帖然道首有力焉道在常山見有中  
 國士女為契丹所俘者出橐裝以贖之皆寄于高尼精舍後相次  
 訪其家以歸之又契丹先留道與李崧和凝及文武官等在常山  
 是歲閏七月二十九日契丹有詔追崧令選朝士十人赴木葉山  
 行事此帥滿達勒召道等至帳所欲諭之崧偶先至知其意懼形  
 于色滿達勒將以明日與朝士齊遣之崧乃不俟道與凝先出既  
 而相遇于帳門之外因與分首俱歸俄而李筠等縱火與契丹交  
 鬪鼓樂相及是日若齊至與滿達勒相見稍或躊躇則悉為俘矣  
 時論者以道布衣有至行立公朝有重望其陰報昭感多此類也  
 及自常山人覲漢祖嘉之拜守太師

洛陽摺紳舊聞記贈大監張公瓌漢祖即  
 位之初為上黨戎判漢祖在北京時大聚  
 甲兵禁牛皮不得私貿易及民間盜用之如有牛死即時官納其皮其有犯者甚眾及即大位三  
 司舉行請禁天下牛皮法與河東時同天下苦之會上黨民犯牛皮者二十餘人獄成罪俱當死

勤本名子

勤本名子

大監時為判官獨執曰主上欽明三司不合如此起請二十餘人死向間可使天下犯者皆銜冤  
 而死乎且主上在河東大聚甲兵須藉牛皮嚴禁之可也今為天下君何少牛皮立法至于此乎  
 遂封奏之時三司使方用事執政之地除馮瀛王外皆惡之曰豈有州郡使敢非朝廷詔敕力言  
 于漢祖漢祖亦怒曰昭義一判官是何敢如此其犯牛皮者依敕俱死大監以非毀詔敕亦死敕  
 未下獨瀛王非時請見漢祖出瀛王曰陛下在河東時斷牛皮可也今既有天下牛皮不合禁陛  
 下赤子枉死之亦足為陛下惜昭義判官以卑位食陛下祿居陛下官不惜軀命敢執而奏之可  
 賞不可殺臣當輔弼之任使此敕枉害天下人性命臣不能早奏使陛下正臣罪當誅稽首再拜  
 又曰張璠不合加罪望加赦之漢祖久之曰已行之矣馮瀛王曰敕未下漢祖遽曰與赦之馬  
 曰勒停可乎上曰可由是改其敕記其畧曰三司邦計國法依張璠體事未明執理乖當宜停  
 見職犯皮者貸命放之大監聽宣敕訖聞敕云執理乖當尚日中書自不能執理若一一教外道  
 判官執理則馬用彼相乎

乾祐中道奉朝請外平居自適一日著長樂老自敘云  
 余世家宗族本始乎長樂二郡歷代之名實具載于國史家牒余  
 先自燕亡歸晉事莊宗明宗閔帝清泰帝又事晉高祖皇帝少帝  
 契丹據汴京為北主所制自鎮州與文武臣僚馬步將士歸漢朝  
 事高祖皇帝今上願以久叨祿位備歷艱危上顯祖宗下光親戚  
 亡曾祖諱湊累贈至太傅亡曾祖母崔氏追封梁國太夫人亡祖  
 諱炯累贈至太師亡祖母褚氏追封吳國太夫人亡父諱良建祕

勤本名子

書少監致仕累贈至尙書令母張氏追封魏國太夫人余階自將  
仕郎轉朝議郎朝散大夫銀青光祿大夫金紫光祿大夫特進開  
府儀同三司職自幽州節度巡官河東節度巡官掌書記再爲翰  
林學士改授端明殿學士集賢殿大學士太微宮使再爲宏文館  
大學士又充諸道鹽鐵轉運使南郊大禮使明宗皇帝晉高祖皇  
帝山陵使再授定國軍節度同州管內觀察處置等使一爲長春  
宮使又授武勝軍節度鄧隨均房等州管內觀察處置等使官自  
攝幽府參軍試大理評事檢校尙書祠部郎中兼侍御史檢校吏  
部郎中兼御史中丞檢校太尉同中書門下平章事檢校太師兼  
侍中又授檢校太師兼中書令正官自行臺中書舍人再爲戶部  
侍郎轉兵部侍郎中書侍郎再爲門下侍郎刑部吏部尙書右僕  
射三爲司空兩在中書一守本官又授司徒兼侍中賜私門十六

仍本有州  
字

戟又授太尉兼侍中又授戎太傅又授漢太師爵自開國男至開  
國公魯國公再封秦國公梁國公燕國公齊國公食邑自三百戶  
至一萬一千戶食實封自一百戶至一千八百戶勳自柱國至上  
柱國功臣名自經邦致理翊贊功臣至守正崇德保邦致理功臣  
安時處順守義崇靜功臣崇仁保德寧邦翊聖功臣先娶故德州  
戶掾褚諱瀆女早亡後娶故景州弓高縣孫明府諱師禮女累封  
蜀國夫人亡長子平自祕書郎授右拾遺工部度支員外郎次子  
吉自祕書省校書郎授膳部金部職方員外郎屯田郎中第三子  
子可自祕書省正字授殿中丞工部戶部員外郎第四子幼亡第  
五子義自祕書郎改授銀青光祿大夫檢校國子祭酒兼御史中  
丞充定國軍衙內都指揮使職罷改授朝散大夫左春坊太子司  
議郎太常丞第六子正自協律郎改授銀青光祿大夫檢校國子

仍本有原  
職  
仍本有原  
字

祭酒兼御史中丞充定國軍節度使職罷改授朝散大夫太僕丞  
長女適故兵部崔侍郎諱衍子太僕少卿名絢封萬年縣君三女  
子早亡二孫幼亡唐長興二年敕瀛州景城縣莊來蘇鄉改爲元  
輔鄉朝漢里爲孝行里洛南莊貫河南府洛陽縣三州鄉靈臺里  
奉晉天福五年敕三州鄉改爲上相鄉靈臺里改爲中台里時守  
司徒兼侍中又奉八年敕上相鄉改爲太尉鄉中台里改爲侍中  
里時守太尉兼侍中靜思本末慶及存亡蓋自國恩盡從家法承  
訓誨之旨關教化之源在孝于家在忠于國口無不道之言門無  
不義之貨所願者下不欺于地中不欺于人上不欺于天以三不  
欺爲素賤如是貴如是長如是老如是事親事君事長臨人之道  
曠蒙天恕累經難而獲多福曾陷蕃而歸中華非人之謀是天之  
祐六合之內有幸者百歲之後有歸所無以珠玉含當以時服歛

抄本

以遽條葬及擇不食之地而葬焉以不及于古人故祭以特羊戒  
殺生也當以不害命之物祭無立神道碑以三代墳前不獲立碑  
故無請諡號以無德故又念自賓佐至王佐及領藩鎮時或有微  
益于國之事節皆形于公籍所著文章篇詠因多事散失外收拾  
得者編于家集其間見其志知之者罪之者未知眾寡矣有莊有  
宅有羣書有三子可以襲其業于此日五盥日三省尙猶日知其  
所亡月無忘其所能爲子爲弟爲人臣爲師長爲夫爲父有子有  
猶子有孫奉身卽有餘矣爲時乃不足不足者何不能爲大君致  
一統定八方誠有愧于歷職歷官何以答乾坤之施時開一卷時  
飲一杯食味別聲被色老安于當代耶老而自樂何樂如之時乾  
祐三年宋明月長樂老敘云及太祖平內難議立徐州節度使劉  
贊爲漢嗣遣道與祕書監趙上交樞密直學士王度等往迎之道

尋與贊自徐赴汴行至宋州會澶州軍變樞密使王峻遣郭崇頌  
 兵至屯于衙門外時道與上交等宿于衙內是日贊率左右甲士  
 闔門登樓詰崇所自崇言太祖已副推戴左右知其事變以為為  
 道所賣皆欲殺道等以自快趙上交與王度聞之皆惶怖不知所  
 為惟道偃仰自適畧無懼色尋亦獲免焉道微時嘗賦詩云終聞  
 海嶽歸明主未省乾坤陷古人至是其言驗矣青箱雜記載馮道詩全篇  
 云莫為危時便愴神前程  
 往往有期因終聞海嶽歸明主未省乾坤陷吉人道德幾時曾  
 去世舟車何處不通津但教方寸無諸惡狠虎叢中也立身  
 廣順初復拜太師中書  
 令太祖甚重之每進對不以名呼及太祖崩世宗以道為山陵使  
 會河東劉崇入寇世宗召大臣議欲親征道諫止之世宗因言唐  
 初天下草寇蜂起並是太宗親平之道奏曰陛下得如太宗否世  
 宗怒曰馮道何相少也乃罷及世宗親征不及扈從留道奉太祖  
 山陵時道已抱疾及山陵禮畢奉神主歸舊宮未及祔廟一夕薨

趙下坐坐心通外作延文慈見  
 趙德考吳

于其策時顯德元年四月十七日也享年七十有三世宗聞之輟  
 視朝三日冊贈尚書令追封瀛王諡曰文懿道歷任四朝三人中  
 書在相位二十餘年以持重鎮俗為己任未嘗以片簡擾于諸侯  
 平生甚廉儉逮至末年閨庭之內稍徇奢靡其子吉尤恣狂蕩道  
 不能制識者以其不終令譽咸歎惜之五代史補馮道之鎮同州也有酒務吏  
 乞以家財修夫子廟道以狀付判官參  
詳其事判官素滑稽因以一絕書判後云荆棘森森遠杏壇儒官高貴盡偷安若教酒務修夫子  
 覺我慙惶也大難道覽之有愧色因出俸重創之馮瀛王道之在中書也有舉子李導投贊所  
 業馮相見之戲謂曰老夫名道其來久矣加以累居相府秀才不可謂不知然亦名導于禮可乎  
 李抗聲對曰相公是無寸底道字小子有寸底導字何謂不可也公笑曰老夫不惟名無寸諸事  
 亦無寸吾子可謂知人矣了無怒色馮吉瀛王道之子能彈琵琶以皮為弦世宗嘗令彈于御  
 前深欣善之因號其琵琶曰繞殿雷也道以其惰業每加譴責而吉攻之愈精道益怒凡與客飲  
 必使庭立而彈之曲罷或賜以束帛命背負之然後致謝道自以為戒昂極矣吉未能後改既而  
 益自若道度無可奈何歎曰百工之司藝而身賤理使然也此子不過太常少卿耳其後果終于  
 此

史臣曰道之履行鬱有古人之風道之字量深得大臣之體然而  
 事四朝相六帝可得為忠乎夫一女二夫人之不幸況于再三者

舊五代史卷一百二十六  
哉所以飾終之典不得謚為文貞文忠者蓋謂此也

永樂大典卷一百七十九  
百三十一

舊五代史卷一百二十六

舊五代史卷一百二十六攷證

周列傳六馮道傳諡曰文懿 案五代通錄作諡文愍見通鑑攷  
異

嘉里舊作解里今改 滿達勒舊作麻荅今改

舊五代史卷一百二十六攷證

舊五代史

卷一百二十六

攷證

舊五代史卷一百二十七

宋薛居正等撰

周書第十八

列傳七

盧文紀字子持京兆萬年人案以下有關文長興末為太常卿文紀形貌魁偉語音高朗占對鏗鏘健于飲啖奉使蜀川路由岐下時唐末帝為岐帥以主禮待之觀其儀形旨趣遇之頗厚清泰初中書闕輔相末帝訪之于朝左右曰臣見班行中所譽當大拜者姚顛盧文紀崔居儉耳或品藻三人才行其心愈惑末帝乃俱書當時清望達官數人姓名投琉璃餅中月夜焚香禱請于天旭旦以筭挾之首得文紀之名次即姚顛末帝素已奇待歡然命之即授中書侍郎同平章事與姚顛同升相位時朝廷兵革之後宗社甫寧外寇



內侵強臣在境文紀處經綸之地無輔弼之謀所論者親愛朋黨  
之小瑕所糾者銓選擬掄之微類時有蜀人史在德爲太常丞出  
入權要之門評品朝士多有譏彈乃上章云文武兩班宜選能進  
用見在軍都將校朝廷士大夫並請閱試澄汰能者進用否者黜  
退不限名位高下疏下中書文紀以爲非已怒甚召諫議盧損爲  
覆狀辭旨無漫爲衆所嗤三年夏晉祖引契丹拒命旣而大軍挫  
衄官寨受圍八月親征過徽陵拜于闕下休于仗舍文紀扈從帝  
顧謂之曰朕聞主憂臣辱予自鳳翔來首命卿爲宰相聽人所論  
將爲便致太平寇孽紛紛令萬乘自行戰賊于汝安乎文紀惶恐  
致謝時末帝季年天奪其魄聲言救寨其實倦行初次河陽召文  
紀張延朗謀議文紀曰敵騎倏往忽來無利則去大寨牢固足以  
枝梧況已有三處救兵可以不戰而解使人督促責以成功輿駕

且駐河橋詳觀事勢況地處舟車之要正當天下之心必若未能  
解圍去亦非晚會延朗與趙延壽款密傍奏曰文紀之言是也故  
令延壽北行末帝坐俟其敗晉祖入洛罷相爲吏部尙書再遷太  
子少傅少帝嗣位改太子太傅漢祖登極轉太子太師時朝官分  
司在洛雖有留臺御史紀綱亦多不整肅遂敕文紀別令檢轄侍  
御史趙礪及糾分司朝臣中有行香拜表疏怠者楊邠怒凡疾病  
不在朝謁者皆與致仕官時文紀別令檢轄之職頗甚滋章因疾  
請假復爲留臺所奏遂以本官致仕歐陽史周太祖人立卽拜司空于家廣順元年夏卒  
年七十六贈司徒輟視朝一日文紀平生積財巨萬及卒爲其子  
龜齡所費不數年間以至蕩盡由是多藏者以爲誡焉永樂七年宋一萬九千九百一十  
馬裔孫字慶先棣州商河人案此下唐末帝卽位用爲翰林學士戶  
部郎中知制誥賜金紫未滿歲改中書舍人禮部侍郎皆帶禁職

尋拜中書侍郎平章事裔孫純儒性多凝滯遽登相位未悉朝廷舊事初馮道罷同州入朝拜司空唐朝故事三公爲加官無單拜者是時朝議率爾命道制出或曰三公正宰相便合參大政又云合受冊衆言藉藉盧文紀又欲祭祀時便令掃除馮道聞之曰司空掃除職也吾無所憚旣而知非乃止劉昫爲僕射性剛羣情嫉之乃其贊右常侍孔昭序論行香次第言常侍侍從之臣行立合在僕射之前疏奏下御史臺定例同光已來李琪盧質繼爲僕射質性輕脫不能守師長之體故昭序輕言裔孫以羣情不悅劉昫馮道欲微抑之乃責臺司須檢則例而臺吏言舊不見例據南北班位卽常侍在前俄屬國屈將就列未定裔孫卽判臺狀曰旣有援據足可遵行各示本官劉昫怒揮袂而退自後曰責臺司定例崔居儉謂南宮同列曰從昭序言語是朝廷人總不解語也且僕

射師長也中丞大夫就班修敬常侍班在南宮六卿之下況僕射乎已前騎省年深望南宮二侍郎如仰霄漢癡人舉止何取笑之深取衆聞居儉言紛議稍息文士哂裔孫堂判有援據二字其中書百職裔孫素未諳棘無能專決但署名而已又少見賓客時人自之爲三不開謂口不開印不開門不開也及太原事起唐末帝幸懷州裔孫留司在洛未幾趙德鈞父子有異志官若危急君臣計無所出俄而裔孫自洛來朝衆相謂曰馬相此來必有安危之策旣至獻綾三百疋卒無獻可之言晉祖受命廢歸田里裔孫好名慕韓愈之爲人尤不重佛及廢居里巷追感唐末帝平昔之遇乃依長壽僧舍讀佛書冀申冥報歲餘枕藉黃卷中見華嚴楞嚴詞理富贍由是酷賞之仍抄撮之相形于歌詠謂之法喜集又纂諸經要言爲佛國記凡數千言或嘲之曰公生平以傳奕韓愈爲

高識何前倨而後恭是佛佞公耶公佞佛耶裔孫笑而答曰佛佞  
子則多矣李崧相晉用李專美爲贊善裔孫以賓客致仕專美轉  
少卿裔孫得太子詹事晉漢公卿以裔孫好爲文章皆欣然待之  
太祖卽位就加檢校禮部尙書太子賓客分司在洛每閉關養素  
惟事謳吟著述嗜八分書題尺酬答必親札以銜其墨蹟裔孫將  
卒之前覩白虺緣于庭槐驅之失所在裔孫感賦鵬之文作槐蟲  
賦以見志廣順三年秋七月卒于洛陽詔贈太子少傅輟視朝一  
日裔孫初爲河中從事因事赴闕宿于邏店其地有上邏神祠夜  
夢神見召待以優禮手授二筆其筆一大一小覺而異焉及爲翰  
林學士裔孫以爲契鴻筆之兆旋知貢舉私自謂曰此二筆之應  
也洎入中書上事堂吏奉二筆熟視大小如昔時夢中所授者及  
卒後旬日有侍婢靈語一如裔孫聲氣處分家事皆有倫理時人

奇之

正德七年十一月十九日

和凝字成績汝陽須昌人也九代祖逢堯唐高宗時爲監察御史  
自逢堯之下仕皆不顯曾祖倣祖濡皆以凝貴累贈太師父矩贈  
尙書令矩性嗜酒不拘禮節雖素不知書見士未嘗有慢色必罄  
家財以延接凝幼而聰敏姿狀秀拔神采射人少好學書一覽者  
咸達其大義年十七舉明經至京師忽夢人以五色筆一束以與  
之謂曰子有如此才何不舉進士自是才思敏贍十九登進士第  
滑帥賀瓌知其名辟賓幕下凝善射時瓌與唐莊宗相拒于河上  
戰胡柳陂瓌軍敗而北惟凝隨之瓌顧曰子勿相隨當自努力凝  
對曰丈夫受人知有難不報非素志也但恨未有死所旋有一騎  
士來逐瓌凝叱之不止遂引弓以射應弦而斃瓌獲免旣而謂諸  
子曰昨非和公無以至此和公文武全才而有志氣後必享重位

和凝

和凝

爾宜謹事之遂以女妻之由是聲望益隆後歷鄆鄧洋三府從事  
唐天成中入拜殿中侍御史歷禮部刑部員外郎改主客員外郎  
知制誥尋召入翰林充學士轉主客郎中充職兼權知貢舉貢院  
舊例放榜之日設棘于門及閉院門以防下第不逞者凝令徹棘  
啓門是日寂無喧者所收多才名之士時議以爲得人灑水燕談苑實初舉進士時和  
凝知貢舉凝常以宰輔自期登第之日名第十三人及覽質文尤加賞歎即以明宗益加器  
重遷中書舍人工部侍郎皆充學士晉有天下拜端明殿學士兼  
判度支轉戶部侍郎會廢端明之職復入翰林充承旨晉祖每召  
問以時事言皆稱旨五年拜中書侍郎平章事六年秋晉高祖將  
幸鄴都時襄州安從進反狀已彰凝乃奏曰車駕離關安從進或  
有悖逆何以待之晉高祖曰卿意如何凝曰以臣料之先人有奪  
人之心臨事卽不及也欲預出宣敕十數道密付開封尹鄭王令

初本号

有緩急卽旋填將校姓名令領兵擊之晉高祖從之及聞唐鄧奏  
報鄭王如所勅遣騎將李建崇監軍焦繼勳等領兵討焉相遇于  
湖陽從進出于不意甚訝其神速以至于敗由凝之力也少帝嗣  
位加右僕射開運初罷相守本官未幾轉左僕射漢興授太子太  
保國初遷太子太傅顯德二年秋以背疽卒于其第年五十八輟  
視朝兩日詔贈侍中凝性好修整自釋褐至登台輔車服僕從必  
加華楚進退容止倖如也又好延納後進士無賢不肖皆虛懷以  
待之或致其仕進故甚有當時之譽平生爲文章長于短歌艷曲  
尤好聲譽有集百卷自篆于版模印數百帙分惠于人焉宋朝類苑和魯公凝  
有豔詞一編各香奩集凝後貴乃嫁其各爲韓偓今世傳韓偓香奩集乃凝所爲也凝生平著述  
分爲演綸遊藝孝悌疑獄香奩金六集自爲遊藝集序云予有香奩金三集不行于世凝在  
政府遊藝論諱其名又欲後人知長子峻卒于省郎次子峴凝續萬花谷滄蜀公  
故于遊藝集序實之此凝之意也峴蒙求云和峴音相和  
凝之子峴生會慶入翰林加金紫知貢舉凝喜曰我仕皇朝爲司勳員外郎  
生平美事三者併集此子宜加我矣因名曰三美

初本号

蘇禹珪字元錫其先出于武功近世家高密今為郡人也父仲容以儒學稱于鄉里唐末舉九經補廣文助教遷輔唐令累贈太師禹珪性謙和虛襟接物克構父業以五經中策辟遼州倅職歷青鄆從事轉潞并管記累檢校官至戶部郎中漢高祖作鎮并門奏為兼判開運末契丹入汴漢祖即位于晉陽授中書侍郎平章事漢祖莅阼兼刑部尚書俄加右僕射集賢殿大學士漢祖大漸與蘇逢吉楊邠等受顧命立少主明年轉左僕射三年冬太祖入平內難禹珪遁入都城為兵士所擄翼日太祖令人求之既見撫慰甚至尋復其位國初加守司空尋罷相守本官世宗嗣位封莒國公未幾受代歸第顯德三年正月旦與客對食之際暴疾而卒時年六十二禹珪純厚長者遭遇漢祖及蘇逢吉夷滅禹珪恬然無咎時人以為積善之報也子德祥登進士第累歷臺省

初崇大興夫三年三月九十一

景範淄州長山人

案此下有開文據世宗紀景範父名初以戶部郎中致仕

世宗之北征也命為東京

副留守車駕迴自河東世宗以艱于國用乃以範為中書侍郎平

章事判三司

冊府元龜載世宗即位七月癸巳制曰朕自履辰極思平泰階出一念慮下民之未從行一事懼上宮之罔祐晨興夕惕終歲于茲雖禮讓漸開興行而

風雨未之成若豈刑政之斯闕而德教之未孚哉由是進用良臣輔宣皇化雖朕志先定亦興情具瞻爰擇嘉辰誕敷明命樞密院直學士中大夫尚書工部侍郎上柱國晉陽縣開國男食邑三百戶賜紫金魚袋兼舊佐先帝每蕃嘉謨速事躬愈傾忠節奉上得大臣之體檢身為君子之儒一昨戎輅親征皇都是守贊勳賢于留府副徵發于行營軍政所需國用無闕今則靈臺偃革宣室圖功思先朝欲用之言成聖考得賢之美俾參大政仍掌利權爾其明聽朕言往敷教化予欲則垂象而清品彙爾則順天道以敘彝倫予欲恤刑名而息戰爭爾則謹憲章而恢廟畧天人之際懸合軍民之事罔渝則國相之尊非爾孰處邦計之重惟材是臧勉思儻以

重剛正無所屈撓然理繁治劇非其所長雖悉心盡瘁終無稱職

之譽世宗知之因其有疾乃罷司計尋以父喪罷相東歸顯德三

年冬以疾卒于鄉里優詔贈侍中官為立碑焉

小宋大興夫一三九百上

史臣曰夫以稽古之力取秉鈞之位者豈常人乎然文紀耽于貨殖裔孫傷于齷齪則知全其德者鮮矣如成績之文采元錫之履

行景範之純厚皆得謂之君子儒矣以之爰立何用不臧

亦宋史卷六  
二十三

舊五代史卷二百二十七

二十五

舊五代史卷一百二十七攷證

周列傳七和凝傳欲預出宣敕十數道密付開封尹鄭王令有緩  
急卽旋填將校姓名令領兵擊之 案洛陽搢紳舊聞記作已  
命高行周爲招討張從恩爲都監仍令焦繼勳等數人備指使  
是晉祖未北征已命將校矣與是書異

舊五代史卷一百二十七攷證

舊五代史

卷一百二十七攷證

舊五代史卷一百二十八

宋薛居正等撰

周書第十九

列傳八

王朴字文伯東平人也父序以朴貴贈左諫議大夫朴幼警慧好學善屬文漢乾祐中擢進士策解褐授校書郎依樞密使楊邠館于邠第是時漢室寢亂大臣交惡朴度其必危因乞告東歸未幾李業輩作亂害邠等三族凡遊其門下者多被其禍而朴獨免國初世宗鎮澶淵朝廷以朴為記室及世宗為開封尹拜右拾遺充開封府推官世宗嗣位授比部郎中賜紫二年夏世宗命朝廷文學之士二十餘人各撰策論一首以試其才時朴獻平邊策云唐失道而失吳蜀晉失道而失幽并觀所以失之由知所以平之術

當失之時莫不君暗政亂兵驕民困近者奸于內遠者叛于外小  
不制而至于大大不制而至于僭天下離心人不用命吳蜀乘其  
亂而竊其號幽并乘其間而據其地平之之術在乎反唐晉之失  
而已必先進賢退不肖以清其時用能去不能以審其材恩信號  
令以結其心賞功罰罪以盡其力恭儉節用以豐其財徭役以時  
以阜其民俟其倉廩實器用備人可用而舉之彼方之民知我政  
化大行上下同心力强財足人和將和有必取之勢則知彼情狀  
者願爲之間諜知彼山川者願爲之先導彼民與此民之心同是  
與天意同與天意同則無不成之功攻取之道從易者始當今吳  
國東至海南至河可撓之地二千里從少備處先撓之備東則撓  
西備西則撓東必奔走以救其弊奔走之間可以知彼之虛實衆  
之強弱攻虛擊弱則所向無前矣勿大舉但以輕兵撓之彼人怯

知我師入其地必大發以來應數大發則必民困而國竭一不大  
發則我獲其利彼竭我利則江北諸州乃國家之所有也既得江  
北則用彼之民揚我之兵江之南亦不難而平之也如此則用力  
少而收功多得吳則桂廣皆爲內臣岷蜀可飛書而召之如不至  
則四面並進席卷而蜀平矣吳蜀平幽可望風而至惟并必死之  
寇不可以恩信誘必須以強兵攻之然其力已喪不足以爲邊患  
可爲後圖候其便則一削以平之方今兵力精練器用具備羣下  
知法諸將用命一稔之後可以平邊此歲夏秋便可于沿邊貯納  
臣書生也不足以講大事至于不達大體不合機變望陛下寬之  
世宗覽之愈重其器識未幾遷左諫議大夫知開封府事初世宗  
以英武自任喜言天下事常憤廣明之後中土日蹙值累朝多事  
尙未克復慨然有包舉天下之志而居常計事者多不喻其旨惟

完之不學東都李昭時抄印  
佳有符室俄同議



朴神氣勁峻性剛決有斷凡所謀畫動恆世宗之意由是急于登  
 用尋拜左散騎常侍充端明殿學士知府如故是時初廣京城朴  
 奉命經度凡通衢委巷廣袤之間靡不由其心匠及世宗南征以  
 朴為東京副留守車駕還京改戶部侍郎兼樞密副使未幾遷樞  
 密使檢校太保項之丁內艱尋起復授本官四年冬世宗再幸淮  
 甸兼東京留守京邑庶務悉以便宜制之比及入蹕都下肅如也  
 默記引問談錄云朴性剛烈大臣藩鎮皆憚之世宗收淮南俾朴留守時以街巷隘狹例從展拆  
 朴怒庖校弛慢于通衢中鞭背數十其人忿然歎曰宜補廂虞候豈得便從決朴微聞之命左右  
 擒至立斃于馬前世宗聞之笑謂近臣曰此大  
 愚人去王朴面前諂宣補廂虞候宜其死矣  
 六年三月世宗令樹斗門于汴口  
 不踰時而歸朝是日朴方過前司空李穀之第交談之頃疾作而  
 仆于座遽以肩昇歸第一夕而卒時年四十有五  
 默記王朴仕周世宗  
 正星歷修刑統百廢俱起又取三關取淮南皆朴  
 為謀然事世宗纔四年耳使假之壽考安可量也  
 世宗聞之駭愕即時幸其第及  
 柩前以所執玉鉞卓地而慟者數四贈賻之類率有加等優詔贈

朴本志

朴本志

朴本志

朴本志

侍中宋史王勣傳朴卒世宗幸其第召見蕭蕭以侁為東頭供奉官朴性敏銳然傷于太剛每稠人廣坐之  
 中正色高談無敢觸其鋒者故時人雖服其機變而無恭謹之譽  
 其筆述之外多所該綜至如星緯聲律莫不畢殫其妙所撰大周  
 欽天曆及律準並行于世默記云周世宗于禁中作功臣閣畫當時大臣如李穀鄭  
 相對太祖望見卻立聳然整御袍襟帶整折翰躬左右曰陛下貴為天子彼前朝之臣禮何過也  
 太祖以手指御袍云此人在朕不得此袍著其敬畏如此  
 五代史闕文周顯德中朴與魏仁浦  
 俱為樞密使時太祖皇帝已掌禁兵一日有殿直乘馬誤衝太祖導從太祖自詣密地訴其無禮  
 仁浦令殿院勘詰朴謂太祖曰太祖名位雖高未加使相殿直廷臣也與太祖比肩事主太祖况  
 帶職不宜如此太祖唯唯而出臣謹案朴之行事傳于人口者甚眾而史臣闕書臣聞重修太祖  
 實錄已于李穀傳中見朴遺事今復補其大者况太祖太宗在位每稱朴有上輔之器朝列具  
 楊凝式華陰人也房官紀聞載凝式年譜云唐咸通十四年癸巳凝式是  
 年生故題識多自稱癸巳人又別傳云凝式字景度父涉唐末  
 梁初再登台席罷相守左僕射卒歐陽史楊涉傳云祖收父嚴吳績纂誤云收  
 與嚴乃兄弟非父子也又游宦紀聞載楊氏  
 家譜云唐修行楊氏系出越公房本出中山相結次子繼生洛州刺史暉暉生河間太守恩恩生  
 越泰公鈞出居馮翊至藏器徙潯陽唐相楊收之父曰遺直生四子各皆從又曰發假收嚴以四  
 時為義故發之子各皆從不假之子從火收之子從金嚴之子從水嚴生涉涉生凝式凝式體  
 而收乃藏器之兄涉之伯也新五代史記唐六臣傳乃以收為涉之祖嚴之父非也  
 凝式體  
 雖最耿而精神穎悟宣和書譜云凝式形貌寢  
 倪然精神矍鑠要大于身富有文藻大為時輩所推

仍本志又  
見上協

仍本志又  
全又見上協





了哉中皆皆神仙情肅可也尹洛者  
皆當時王以註或傲此不以為我尹亦以  
且者後世不之也註或本名家既  
也色情而唐樂之也亦非我日主謀量  
宏廟竟元三季之福以看考終洛陽  
法仲宗書跡已入本朝與國中三川大  
寺利亦多難地指星石存三數今有  
對壁存于士大夫家亦有友其書惟時  
歲并以為法注以難此行書頗難教  
者以謂之故揚云 外學其行勝今其勝

盧損其先范陽人也近世任于嶺表父頴遊宦于京師損少學為  
文梁開平初舉進士性頗剛介以高情遠致自許與任贊劉昌素  
薛鈞高總同年擢第所在相詬時人謂之相罵賸及任贊劉昌素  
居要切之地而損自異不相親狎時左丞李琪素薄劉昌素之為  
人常善待損琪有女弟眇長年婚對不售乃以妻損損慕琪聲稱  
納之及琪為輔相致損仕進梁貞明中累遷至右司員外郎唐天  
成初出兵部郎中史館修撰轉諫議大夫屢上書言事詞理淺陋  
不為名流所知清泰中盧文紀作相密與損參議時政初長興中  
唐末帝鎮河中損嘗為加恩使副及末帝即位用為御史中丞拜  
命之日以自前憲司不能振舉綱領俾風俗頹壞乃大為條奏而  
有平明放鑰日出守端之語大為士人嗤鄙有頃誤詳赦書失出  
罪人停任晉天福中復為右散騎常侍轉祕書監大失所望即拜

章辭位乃授戶部尚書致仕退居潁川時少保李麟年將八十善  
服氣導引損以鱗之遐齡有道術酷慕之仍以潁川逼于城市乃  
卜居陽翟誅茅種藥山衣野服逍遙于林圃之間出則柴車鶴氅  
自稱具茨山人晚年與同輩五六人于大隗山中疏泉鑿壑為隱  
所誓不復出山久之齒髮不衰似有所得廣順三年秋卒時年八  
十餘贈太子少傅

小字大與年二十日十二

王仁裕字德輦天水人少孤不從師訓年二十五方有意就學一  
夕夢剖其腸胃引西江水以浣之又睹水中砂石皆有篆文因取  
而吞之及寤心意豁然自是姿性絕高

案此下有闕文輿地紀勝云王仁裕知貢舉時所取進士三十三人皆一時名

公卿李助有詩萬餘首勒成百卷目之曰西江集蓋以嘗夢吞西江  
文石遂以為各焉

輿地紀勝云裕所著有紫泥集西江集入洛記共百卷

卒

丹府元龜天祐九年五月次史補王若書仁裕乾祐初授一摺二百一十四人乃自若書云二百一十四門生若仁裕初動毛羽輕柳金換印天恩程登歷倫將持二名肉數名若書未始欲波見詩伴若日大有七弄不主王仁裕今日做賊頭也問若皆火天

仍本七  
仍本七  
仍本七

裴羽字用化唐僖宗時宰相贊之子也羽少以父任爲河南壽安尉入梁遷御史臺主簿改監察御史唐明宗時爲吏部郎中使于閩遇颶風飄至錢塘時安重誨用事削奪吳越王封爵羽被留于錢塘經歲不得歸後重誨死吳越復通中國羽始得還晉初累遷禮部侍郎太常卿廣順初爲左散騎常侍卒贈工部尚書羽之使閩也正使陸崇卒于吳越羽載其喪還歸其橐裝時人義之段希堯河內人也祖約定州戶掾贈太常少卿父昶晉州神山縣令累贈太子少保希堯少有器局累歷州縣唐天成中爲衛州錄事參軍會晉高祖作鎮于鄴聞其勤幹奏改洛州糾曹及晉祖鎮太原辟爲從事清泰中晉祖總戎于代北一日軍亂遽呼萬歲晉高祖惑之希堯曰大兵猶火也弗戢將自焚遽請戮其亂首乃止明年晉祖將舉義于太原召賓佐謀之希堯極言以拒之晉祖以

其純樸弗之咎也晉祖龍飛霸府舊僚皆至達官惟希堯止授省郎而已天福中稍遷右諫議大夫尋命使于吳越及乘舟汎海風濤暴起檝師僕從皆相顧失色希堯謂左右曰吾生平履行不欺暗室昭昭天鑒豈無祐乎汝等但以吾爲託必當無患言訖而風止乃獲利涉使迴授萊州刺史檢校尚書右僕射未赴任改懷州六年秋移棣州刺史兼權鹽礬制置使少帝嗣位加檢校司空開運中歷戶部兵部侍郎漢初遷吏部侍郎判東西兩銓事國初拜工部尚書世宗嗣位轉禮部尚書顯德三年夏卒于洛陽時年七十有九贈太子少保子思恭右諫議大夫

小宋大典卷一百八十三上

司徒誦字德普清河郡人也父倫本郡督郵以清白稱誦少好讀書通五經大義弱冠應鄉舉不第唐明宗之鎮邢臺誦往謁之甚見禮遇命試吏于邯鄲歷永年項城令皆有能名長興初唐末帝

鎮河中奏辟為從事未幾徵拜左補闕史館修撰秦王從榮之開府也朝廷以詔為戶部員外郎充河南府判官秦王遇害以例貶寧州司馬清泰初人為兵部員外郎晉祖踐阼改刑部郎中充度支判官樞密直學士由兵部郎中遷左諫議大夫給事中充集賢殿學士判院事轉左散騎常侍工部侍郎歷知許齊毫三州事漢初除禮部侍郎凡三主貢舉自起部貳卿不數年間徧歷六曹由吏部侍郎拜太子賓客世宗即位授太常卿時世宗留意于雅樂議欲攷正其音而詔為足疾所苦居多假告遂命以本官致仕顯德六年夏卒于洛陽之私第年六十有六贈工部尚書諡善談論性嗜酒喜賓客亦信浮圖之教漢乾祐中嘗使于吳越航海而往至渤海之中睹水色如墨舟人曰其下龍宮也詔因注香輿念曰龍宮珍寶無用俟迴棹之日當以金篆佛書一帙用伸贊獻泊復

經其所遂以經一函投于海中俄聞梵唄絲竹之音喧于船下舟人云此龍王來迎其經矣同舟百餘人皆聞之無不歎訝焉

邊蔚字德昇長安人父操華州下邽令累贈太子少師宋史邊蔚華州鄭人也曾祖頤

石泉令祖操下邽令父蔚太常卿蔚幼孤篤學有鄉里譽從交辟歷晉陝華三府從事

唐莊宗之伐蜀大軍出于華下時蜀華方闕帥蔚為記室詔令權

領軍府事供億軍儲甚有幹濟之稱及明宗入洛遣李冲齋詔于

關右盡誅閹官冲性深刻而華人有為閹官所累者冲欲盡戮之

蔚以理救護獲免者甚眾毛璋之鎮邠寧奏為廉判時璋為麾下

所或有跋扈之意蔚因乘間極言論以逆順之理璋即時遣其子

入貢朝廷以蔚有贊畫之效錫以金紫改許州戎判晉天福初自

涇州戎幕徵拜虞部員外郎監鐵判官歷開封廣晉少尹晉少帝

嗣位拜左散騎常侍判廣晉府事轉工部左右侍郎再知開封府

事開運初出爲亳州防禦使爲政清肅亳民感之歲餘入爲戶部侍郎漢初拜御史中丞轉兵部侍郎太祖受命復知開封府事遷太常卿後以足疾辭位顯德三年冬卒于家時年七十有二子玠玘俱仕皇朝爲省郎

永樂大典卷四千七百三十一

王敏字待問單州金鄉人性純直少力學攻文登進士策後依杜重威凡歷數鎮從事漢初重威叛于鄴時敏爲留守判官嘗泣諫重威懇請歸順重威始雖不從及其窮也納敏之言以其城降時魏之饑民十猶四五咸保其餘生者敏之力也入朝拜侍御史世宗鎮澶淵太祖以敏謹厚遂命爲澶州節度判官及世宗尹正王畿改開封少尹世宗嗣位權知府事旋拜左諫議大夫給事中遷刑部侍郎敏常以子壻陳南金薦于曹州節度使李繼勳表爲記室其後繼勳僨軍于壽春及歸闕而無待罪之禮世宗以繼勳武

臣不之責也因遷怒南金謂其裨贊無狀乃黜之敏由是連坐遂免其官歲餘復拜司農卿顯德四年秋以疾卒

永樂大典卷四千七百三十一

舊五代史卷一百二十八

舊五代史卷一百二十八攷證

周列傳八楊凝式傳歷右常侍工戶二部侍郎 案別傳作工禮  
戶三部侍郎

年八十五 案別傳作八十二

裴羽傳贈工部尙書 案歐陽史作戶部尙書

段希堯傳河內人也 案宋史段思恭傳作澤州晉城人也

舊五代史卷一百二十八攷證



舊五代史卷一百二十九

宋薛居正等撰

周書第二十

列傳九

常思字克恭太原人也父仁岳河東牙將累贈太子太師唐莊宗之爲晉王也廣募勝兵時思以趨悍應募累從戎役後爲長直都校歷捧聖軍使晉初遷六軍都虞候漢高祖出鎮并門奏以思從行尋表爲河東牢城都指揮使以勤幹見稱漢國初建授檢校太保遙領鄧州漢有天下遷檢校太尉昭義軍節度使乾祐初李守貞叛于河中太祖征之朝廷命思帥部兵以副焉旣而御眾無能勒歸舊藩思在上黨凡五年無令譽可稱唯以聚斂爲務性又鄙恠未嘗與賓佐有酒肴之會嘗有從事欲求謁見者思覽刺而怒

曰彼必是來獵酒也命與客者飲而遣之其鄙恠也如是太祖受命就加平章事初太祖微時以季父待思及即位遣其妻入覲太祖拜之如家人之禮仍呼曰叔母其恩顧如是廣順二年秋思來朝加兼侍中移鎮宋州三年夏詔赴闕改授平盧軍節度使思將赴鎮奏太祖云臣在宋州出鎮得絲十餘萬兩謹以上進請行徵督太祖領之尋詔本州折券以諭其民及到鎮未幾染風痺之疾上表請尋醫既而昇疾歸洛顯德元年春卒年六十有九贈中書令

初山平大興長天八十百十二

翟光鄴字化基濮州鄆城人父景珂倜儻有膽氣梁貞明初唐莊宗始駐軍于河上景珂率聚邑人守永定驛固守踰年後爲北軍所攻景珂戰沒焜潰光鄴時年十歲爲明宗軍所俘以其穎悟俾侍左右字之曰牙定自元次教有謀蒞事實過明宗即位特深委

遇累遷至皇城使檢校司空長興中樞密使安重誨得罪時光鄴與中官孟小僧頗有力焉居無何出爲耀州團練使清泰初入爲左監門衛大將軍晉天福中歷棣沂二州刺史西京副留守開運初授宣徽使楊光遠叛滅青州平除爲防禦使朝廷以兵亂之後人物彫弊故命光鄴理之光鄴好聚書重儒者虛齋論議惟求理道時郡民喪亡十之六七而招懷撫諭視之如傷故朞月之間流亡載輯契丹入汴僞命權知曹州李從益假號以光鄴明宗舊臣署爲樞密使漢祖至汴改左領衛大將軍乾祐初遷右金吾衛大將軍充街使檢校太保太祖踐阼復授宣徽使左千牛衛上將軍檢校太傅數月兼樞密副使會永興李洪信入朝代知軍府事廣順二年十月卒于長安時年四十六光鄴有器度慎密敦厚出于天然喜愠不形于色事繼母以孝聞兄弟皆雍睦雖食祿日久家

無餘財任金吾日假官屋數間以蔽風雨親族累重糲食纔給人  
不堪其憂光鄴處之晏如也賓朋至則貰酒延之談說終日畧無  
厭倦士大夫多之及權知京兆以寬靜為治前政有煩苛之事一  
切停罷百姓便之及病甚召親隨于臥內戒之曰氣絕之後以尸  
歸洛不得于此停留慮煩軍府言訖而終京兆吏如喪所親或有  
以漿酒遙奠者樞密使王峻素重光鄴且欲厚卹其家為之上請  
故自終及葬所賜賻賵幾數千計詔贈太子少師光鄴膚革肥皙  
善于攝養故司天監趙延又有哀許之術嘗謂人曰翟君外厚而  
內薄雖貴而無壽果如其言

永樂大典卷二百二十二百四十一

曹英字德秀舊名犯今上御名故改焉本常山鎮定人父全武事  
趙王王鎔為列校英因得隸于鎔之帳下及張文禮之亂唐莊宗  
奄有其地乃錄鎔之左右署為散指揮使明宗即位英侍于帳下

仍本太祀  
亦詳

問其祖考英以實對明宗曰乃朕之舊也擢為本班行首每加顧  
遇晉天福中遷弩手軍使平張從賓于汜水以功授本軍都校漢  
初改奉國軍主加檢校司徒兼康州刺史乾祐初李守貞據河中  
叛授行營步軍都校河中平遷本軍廂主領岳州防禦使隨太祖  
在魏為北面行營步軍都校從平內難國初以翊戴功授昭武節  
度使檢校太傅侍衛步軍都指揮使二年春總兵討慕容彥超于  
宛州梯衝塹壘頗有力焉夏五月太祖親征因併兵攻陷其城及  
凱旋領彰信軍節度使典軍如故世宗嗣位加同平章事授成德  
軍節度使車駕自太原過加兼侍中顯德元年冬卒于鎮時年四  
十有九制贈中書令英性沈厚謙恭有禮雖在席之際接對賓客  
亦未嘗造次及卒搢紳之士亦皆惜之

永樂大典卷四百六十五

李彥穎字德循太原人也本以商賈為業太祖鎮鄴寘之左右及

卽位歷綾錦副使擢易使世宗嗣位以彥頹有舊超授內客省使未幾知相州軍府事尋改延州兵馬留後到鎮頗以殖貨爲意窺圖贖利侵漁蕃漢部人羣情大擾會世宗南征蕃部結聚圍迫州城彥頹閉壁自守求援于隣道賴救兵至乃解世宗不悅徵赴京師然猶委曲庇護竟不之責尋爲西京水南巡檢使居無何命權知泗州軍州事改滄州兩使留後彥頹到任處置乖方大爲物情所鄙顯德六年秋受代歸闕遇疾而卒時年五十有二

宋史大傳卷一百三十九

李暉字順光瀛州東城人弱冠應募于龍驤軍漢祖領河東暉請從因得署爲河東牙將漢有天下授檢校司徒大內皇城使未幾遷宣徽南院使乾祐初拜河陽節度使檢校太傅太祖登極加同平章事尋移鎮滄州顯德元年就加兼侍中二年秋以世宗誕慶節來朝改邠州節度使五年移鎮鳳翔歲餘卒于鎮優詔贈中書

令暉之儀貌不及于常人而位極將相年登耳順袁許之術夫何恃哉然性貪鄙而好小惠以邀虛譽在河陽及滄州日民皆詣闕請立碑以頌其美識者亦未之許也

宋史大傳卷一百三十九

李建崇潞州人少從軍善騎射初事唐武皇爲鐵林都將轉突騎飛騎二軍使從莊宗攻常山索巴堅來援莊宗率親軍千騎遇于滿城兵少爲契丹所圍時建崇爲親將與契丹格鬪自午至申會李嗣昭騎至契丹乃解去同光中自龍武捧聖都指揮使出歷襄秦徐雍都指揮使建崇性純厚處身任遇不能巧宦以致久滯偏裨明宗嘗掌牙兵與建崇共事及卽位甚愍之連授磁沁二郡入晉爲申州刺史天福七年冬襄州安從進搆逆率眾寇南陽時建崇領步騎千餘屯于葉縣開封尹鄭王遣宣徽使張從恩皇城使焦繼勳率在京諸軍會建崇軍拒賊至湖陽縣之花山遇從進軍

建崇接戰大敗之以功授亳州團練使襄陽平遷安州防禦使歷河陽邢州兵馬留後漢初入爲右衛大將軍年逾七十神氣不衰建崇始自代北事武皇至是四十餘年前後所掌兵麾下曲多至節鉞零落殆盡惟建崇雖位不及藩屏而康強自適以至耆耄太祖卽位授左監門衛上將軍廣順三年春卒贈黔南節度使王重裔陳州宛邱人父達歷安均洛三州刺史因家于洛重裔幼沈厚有勇善騎射年未及冠事莊宗爲廳直管契丹直從安汴洛累爲禁軍指揮使晉天福中鎮州安重榮謀叛稱兵指闕朝廷命杜重威率師拒之賊陣于宗城東晉遣騎軍擊之再合不動杜重威懼謀欲抽退重裔曰兵家忌退但請公分麾下兵擊其兩翼重裔爲公陷陣當其中軍彼必狼狽矣重威從之重榮卽時退蹙遂敗以功遷護聖右廂都指揮使領費州刺史漢初仍典禁軍從征

鄴都平遷深州刺史淮夷以李守貞故數侵邊地以重裔爲亳州防禦使又令于徐州巡檢兼知軍州就加檢校太傅太祖踐阼加爵邑改功臣廣順元年夏以疾卒年五十有三贈武信軍節度使孫漢英太原人也父重進事唐武皇莊宗爲大將賜姓名存進唐書有傳漢英少事戎伍稍至都將嘗爲東面馬步軍都指揮使清泰初興元節度使張虔釗失軍于岐下遂以其地西臣于蜀漢英兄漢韶時爲洋州節度使因茲阻隔亦送款于蜀由是漢英與弟漢筠久之不調漢乾祐中太祖西征蒲雍以漢英戚里之分奏于軍中指使蒲雍平班師隱帝以漢英爲絳州刺史檢校司徒廣順元年冬卒于都

永樂大典卷一萬八千四百三十三

許遷鄆州人也初爲本州牙將性剛褊漢乾祐初爲左屯衛將軍與少府監馬從斌同監造漢祖山陵法物節財省用減數萬計改

左監門大將軍又加檢校司空漢末權知隰州太祖踐阼劉崇遣子鈞率兵寇平陽路由于隰賊眾攻城城中兵少遷感激指諭士鬪兼倍賊眾傷夷尋自退去太祖降詔撫諭正授隰州刺史遷切于除盜嫉惡過當或釘磔賊人令部下轡割誤斷不合死罪人其家詣闕致訟詔下開封府獄時陳觀為知府素與遷不協深劾其事欲追遷對訟太祖以事狀可原但罷郡而已遷既奉朝請因大詬陳觀謂王峻曰相公執政所與參議宜求賢德如陳觀者為儒無家行為官多任情苟知其微屠沽兒恥與為侶況明公乎峻無以沮之既而嬰疾請告歸汶上而卒

永樂大典卷一百八十一萬三千三百三十三

趙鳳冀州棗強縣人幼讀書舉童子既長兇豪多力以殺人暴掠為事吏不能禁安重榮鎮常山招集叛亡鳳乃應募既而犯法當死即破械踰獄遁而獲免天福中趙延壽為契丹鄉導歲侵深冀

鳳往依焉

宋史荆罕儒傳罕儒少無賴與趙鳳張輩為羣盜晉天福中相率詣范陽委贄燕王趙延壽得掌兵權

契丹主素聞其桀黠

署為羽林軍使累遷羽林都指揮使常令將兵在邊具冀之民日罹其患晉末契丹入洛鳳從至東京授宿州防禦使漢祖即位受代歸闕尋授河陽行軍司馬乾祐初人為龍武將軍丁父憂起復授右千牛衛大將軍漢末都城變起兵集之夜無不剽之室唯鳳里閭兵不敢犯人皆服其膽勇廣順初用為宋亳宿三州巡檢使鳳出于伏莽尤知盜之隱伏乃誘致盜魁于麾下厚待之每桴鼓之發無不擒捕眾以為能然平民因捕盜而破家者多矣鳳善事人或使臣經由靡不傾財厚奉故得延譽而掩其醜迹太祖聞其幹事用為單州刺史既剛忿不仁得位愈熾刑獄之間尤為不道常抑奪人之妻女又以進奉南郊為名率斂部民財貨為人所訟廣順三年十二月詔削奪鳳在身官爵尋令賜死

永樂大典卷一百八十一萬三千三百三十三

齊藏珍少歷內職累遷諸衛將軍前後監押兵師在外頗稱幹事  
然險詖無行殘忍辯給無不畏其利口廣順中奉命滑州界巡護  
河隄以弛慢致河決除名配沙門島世宗在西班時與藏珍同列  
每聆其談論或剖判世務似有可采及即位自流所徵還秦鳳之  
役令監偏師及淮上用兵復委監護與軍校何超領兵降下光州  
藏珍欺隱官物甚多超以爲不可藏珍曰沙門島已有屋數間不  
妨再去矣其不畏法也如此世宗既破紫金山峯追吳寇至渦口  
因與藏珍言及克捷之狀對曰陛下神武之功近代無比于文德  
則未光世宗領之又問以揚州之事對曰揚州地實卑濕食物例  
多腥腐臣去歲在彼人以鱠魚饋臣者視其盤中虬屈一如虵虺  
之狀假使鸛雀有知亦應不食豈況于人哉其敷奏大率多此類  
聞者無不悚然一日又奏云唐景思已爲刺史臣猶未蒙聖澤世

宗悅而從之時濠梁未下卽命爲濠州行州刺史及張永德與李  
重進有間言藏珍嘗游說重進洎壽陽兵迴諸將中有以藏珍之  
言上奏者世宗怒急召赴闕四年夏以其冒稱檢校官罪按其事  
而斃之蓋不欲暴其惡跡也

宋史大世夫一三〇八卷一三三三

王環本眞定人唐天成初孟知祥鎮西州環往事之及知祥建號  
環累典軍衛孟昶嗣位環常宿衛于中顯德二年秋王師西伐時  
環爲鳳州節度使初偏師傳其城下爲環所敗裨將胡立爲環所  
擒是冬王師大集急攻其城蜀之援兵相次敗走環聞之守備愈  
堅王師攻擊數月方克城陷環就擒及到闕世宗以忠于所事釋  
其罪授右驍衛大將軍四年冬世宗南征環隨駕至泗州遇疾而  
卒

宋史大世夫一三〇八卷一三三三

張彥超本沙陀部人也素有卻克之疾時號爲跛子初以騎射事

唐莊宗為馬直軍使莊宗入汴授神武指揮使明宗嘗以為養子  
 天成中擢授蔚州刺史素與晉高祖不協屬其總戎于太原遂舉  
 其城投于契丹即以為雲州節度使契丹之南侵也彥超率部眾  
 頗為鎮魏之患及契丹入汴遷侍衛馬軍都校尋授晉昌軍節度  
 使漢高祖入洛彥超飛表輸誠移投保大軍節度使乾祐初奉詔  
 歸闕止奉朝請而已太祖自鄴入平內難隱帝令彥超董騎軍為  
 拒劉子陂兵亂彥超先謁見太祖廣順中授神武統軍顯德三年  
 冬以疾終于策制贈太子太師

宋史列傳永德并州楊曲人家世饒財曾

張穎太原人駙馬都尉永德之父也

宋史列傳永德并州楊曲人家世饒財曾多嚴選富家子掌帑庫或調度不給即坐誅沒入貲產不為之滿歲府財有餘累為藩郡列

校由內職歷諸衛將軍國初以戚里之故自華州行軍司馬歷郢  
 懷二州刺史遷安州防禦使穎性下急峻刻不容人之小過雖左

右親信亦皆怨之部曲曹澄有處女穎逼而娶之澄遂與不逞之  
 徒數人同謀害穎中夜挾刃入于寢門執穎而殺之遂奔于金陵  
 世宗征淮南以永德之故遣江南李景令執澄等送行在及至世  
 宗以澄等賜永德俾甘心而戮之

宋史列傳永德并州楊曲人家世饒財曾

劉仁贍畧通儒術好兵書在澤國甚有聲望吳主知之累遷為偽

右監門衛將軍歷黃袁二州刺史所至稱治洎李景僭襲偽位俾  
 掌親軍遷鄂州節度使居數年復以兵柄任之改壽州節度使及

王師渡淮而仁贍固守甚堅洎世宗駐蹕于其壘北數道齊攻填  
 塹陷壁晝夜不息如是者累月世宗臨城以諭之而仁贍但遜詞

以謝及車駕還京命李重進總兵守之復乘間陷我南砦自是圍  
 之愈急城中饑死者甚眾三年冬淮寇復來救援列砦于紫金山

夾道相屬壘然數十里垂及壽壁而重進兵幾不能支世宗患之



初八日午

舊五代史卷一百二十九

遂復議親征車駕至壽春命今上率師破紫金山之衆擒其應援使陳承昭以獻仁贍聞援兵既敗計無所出但扼吭浩歎而已會世宗以紫金山之捷飛詔以諭之時仁贍臥疾已亟因翻然納款而城內諸軍萬計皆屏息以聽其命及見于行在世宗撫之甚厚賜與加等復令入城養病尋授天平軍節度使兼中書令制出之日薨于其家年五十八世宗聞之遣使弔祭命內臣監護喪事追封彭城郡王後以其子崇讚為懷州刺史仁贍輕財重士法令嚴肅重圍之中其子崇諫犯軍禁即令斬之故能以一城之衆連年拒守逮其來降而其下未敢竊議者保其後嗣抑有由焉崇讚仕周累為郡守幼子崇諒後自江南歸于本朝亦位至省郎

宋史卷九十九

舊五代史卷一百二十九攷證

周列傳九張穎傳國初以戚里之故自華州行軍司馬歷鄆懷二州刺史遷安州防禦使 案宋史作事晉為安州防禦使與是書異

劉仁贍傳時仁贍臥疾已亟因翻然納款 案歐陽史云仁贍固守三月病甚已不知人其副使孫羽詐為仁贍書以城降是仁贍未嘗親納款于周也是書作翻然納款蓋仍周實錄原文未及釐正

安巴堅舊作阿保機今改

舊五代史卷一百二十九攷證

舊五代史

舊五代史卷一百三十

宋薛居正等撰

周書第二十一

列傳十

王峻字秀峯相州安陽人也父豐本郡樂營使峻幼慧黠善歌梁  
 貞明初張筠鎮相州憐峻敏惠遂畜之及莊宗入魏州筠棄鎮南  
 渡以峻自隨時租庸使趙巖訪筠于其第筠召峻聲歌以侑酒巖  
 悅筠因以贈之頗得親愛梁亡趙氏族滅峻流落無依寄食于符  
 離陳氏之家久之彌窘乃事三司使張延朗所給甚薄清泰末延  
 朗誅漢祖盡得延朗之資產僕從而峻在籍中從歷數鎮常為典  
 客漢祖踐阼授客省使奉使荆南留于襄漢為監軍入為內客省  
 使及趙思綰作亂于永興漢隱帝命郭從義討之以峻為兵馬都

監從義與峻不協甚如水火未幾改宣徽北院使賊平加檢校太傅轉南院使太祖鎮鄴兼北面兵馬峻爲監軍留駐鄴城隱帝蕭牆變起峻亦爲羣小所構舉家見害從太祖赴闕綢繆帷幄贊成大事峻居首焉京師平定受漢太后命充樞密使太祖北征至澶州爲諸軍擁迫峻與王殷在京聞變乃遣侍衛馬軍都指揮使郭崇往宋州前申州刺史馬鐸往許州以防他變二州安然亦峻之謀也太祖踐阼加平章事尋兼右僕射門下侍郎平章事監修國史時朝廷初建四方多故峻夙夜奉事知無不爲每與太祖商摧軍事未嘗不移時而退甚有裨益然爲性輕躁舉指率易以天下之事爲己任每有啓請多自任情太祖從而順之則忻然而退稍未允可則應聲而愠不遜之語隨事輒發太祖素知其爲人且以佐命之故每優容之峻年長于太祖二歲太祖雖登大位時以兄

呼之有時呼表字不忘布衣之契也峻以此益自負焉廣順元年冬劉崇與契丹圍晉州峻請行應援太祖用爲行營都部署以徐州節度使王彥超爲副詔諸軍並取峻節度許峻以便宜從事軍行資用仰給于官隨行將吏得自選擇將發之前召宴于滋德殿太祖出女樂以寵之奉辭之日恩賜優厚不拘常制及發太祖幸西莊親臨宴餞別賜御馬玉帶執手而別峻至陝駐留數夕劉崇攻晉州甚急太祖憂其不可及議親征取澤州路入與峻會合先令諭峻峻遣驛騎馳奏請車駕不行幸時已降御札行有日矣會峻奏至乃止峻軍旣過絳都距平陽一舍賊軍燔營狼狽而遁峻入晉州或請追賊必有大利峻猶豫久之翌日方遣騎軍襲賊信宿而還向使峻極力追躡則并汾之孽無噍類矣峻亦深恥無功因計度增修平陽故城而迴時永興軍節度使李洪信漢室之密

戚也自太祖踐阼恒有憂沮之意而本城軍不滿千峻出征至陝州以救援晉州爲辭抽起數百人及劉崇北遁又遣禁兵千餘人屯于京兆洪信懼遂請入朝峻軍迴太祖厚加優賜時慕容彥超叛于兗州已遣侍衛步軍都指揮使曹英客省使向訓率兵攻之峻意欲自將兵討賊累言于太祖曰慕容劇賊曹英不易與之敵耳太祖默然未幾親征命峻爲隨駕一行都部署破賊之日峻督軍在城南其衆先登頗有得色從駕還京未幾貢表乞解樞機卽時退歸私第峻貪權利多機數好施小惠喜人附已太祖登極之初務存謙抑潛龍將佐未甚進用其後鄭仁誨李重進向訓等稍遷要職峻心思之至是求退蓋偵太祖之意也未陳請之前多發外諸侯書以求保證旬浹之內諸道馳騎進納峻書聞者驚駭其事峻連三頁章中使宣諭無虛曰太祖嚴駕將幸其策峻聞之卽

馳馬入見太祖慰勞久之復令視事峻又于本院之東別建公署廊廡廳事高廣華侈及土木之功畢請太祖臨幸恩賜甚厚其後內園新起小殿峻視之奏曰宮室已多何用于此太祖曰樞密院舍宇不少公更自興造何也峻慙默而退時峻以前事趙巖頗承寵愛至是欲希贈官立碑或謂峻曰趙巖以詔佞事君破壞梁室至今言者無不切齒苟如所欲必貽物議乃止巖姪崇勳居于陳郡峻爲求官田宅以賜之太祖亦從之三年春修利河堤大興土功峻受詔檢校旣而世宗自澶州入覲峻素憚世宗之聰明英果聞其赴闕卽自河次歸朝居無何邀求兼領青州太祖不得已而授之旣受命求暫赴任奏借左藏綾絹萬匹從之是歲戶部侍郎趙上交權知貢舉上交嘗詣峻峻言及一童子上交不達其旨勝出之日童子不第峻銜之及貢院申中書門下取日過堂峻知印

判定過日及上交引新及第人至中書峻在政事堂厲聲曰今歲  
選士不公當須覆試諸相曰但緣已行指揮行過臨事不欲改移  
況未敕下覆試非晚峻愈怒詬責上交聲聞于外少頃竟令引過  
及罷上交詣本廳謝峻峻親延之飲酌從容翌日峻奏上交知舉  
不公請致之于法太祖領之而已又奏請以顏愆陳觀代范質李  
穀為相太祖曰進退宰輔未可倉卒待徐思之峻論列其事奏對  
不遜太祖未食日將亭午諍之不已太祖曰節假之內未欲便行  
已俟假開即依所奏峻退至中書是月吏部選人過門下峻當其  
事頗疑選部不公其擬官選人落下者三十餘人次日寒食時節  
臣寮各歸私第午時宜召宰臣樞密使及八幽峻于別所太祖見  
馮道已下泣曰峻凌朕頗甚無禮太過擬欲盡去左右臣寮剪朕  
羽翼朕兒在外專意阻隔暫令到闕即懷怨望豈有既總樞機又

兼宰相堅求重鎮尋亦授之任其襟懷尙未厭足如此無君誰能  
甘忍即召翰林學士徐台符等草制其日退朝宣制貶授商州司  
馬差供奉官蔣光遂監送赴商州未幾死于貶所時廣順三年三  
月也通鑑峻至商州得腹疾帝猶怒之命其妻往視之未幾而卒初峻降制除青州有司製造旌節以備

迎授前一夕其旌有聲甚異聞者駭之主者曰昔安重誨授河中  
節亦有此異焉又所居堂陛忽然隱起如堆又夢被官府追攝入  
司簿院既寤心惡之以是尤加狂躁峻才疎位重輕躁寡謀聽人  
穿鼻既國權在手而射利者曲為指畫乃陷餌虎臣離間親舊加  
以善則稱已無禮于君欲求無罪其可得乎五代史關文廣順初河東劉崇引契丹攻晉州遣峻率師赴援

峻頓兵于陝周祖親征遣使諭之峻見使受宣詔謂使曰與某馳還附奏陛下言晉州城堅未易可破劉崇兵鋒方銳不可與力爭所以駐兵者待其氣衰耳非臣怯也陛下新即位不宜輕舉今朝中受聖知者惟李穀范質而已陛下若車駕出汜水則慕容彥超以賊軍入汴大事去矣使復進奏周祖自以手提其耳曰幾敗吾事

慕容彥超案此下為兗州節度使彥超即漢高祖之同產弟也嘗嘗

時下 李通能引薛文老等  
有今元事之五此我蓋老趙以侯  
高祖為元也通能改作今元以未論  
其去今今元事可考故附識于此

李通能引薛文老等  
有今元事之五此我蓋老趙以侯  
高祖為元也通能改作今元以未論  
其去今今元事可考故附識于此

姓閻氏體黑麻面故謂之閻崑崙彥超鎮兗州漢隱帝欲殺周太  
祖召彥超方食釋七箸而就道周兵犯京師隱帝出勞軍太后使  
彥超衛帝彥超曰北兵何能為當于陣上唱坐使歸營彥超敗奔  
兗隱帝遇弒周太祖時彥超進呈鄆州節度使高行周來書其書  
意即行周毀讞太祖結連彥超之意帝覽之笑曰此必是彥超之  
詐也試令驗之果然其鄆州印元有缺文不相接其為印即無缺  
處帝尋命齋書示諭行周行周上表謝恩先是填星初至角亢占  
者曰角鄭分兗州屬焉彥超即率軍府賓佐步出州西門三十里  
致祭迎于開元寺塑像以事之謂之菩薩日至祈禱又命民家豎  
黃旗以禳之及城陷彥超方在土星院燃香急乃馳去代史補慕容彥  
超素有鈞距兗州

之驢耳自昨日不與水草其飢渴者甚矣放之必奔歸家但可躡踪而觀之盜無不獲也親信者  
如其言隨之其驢果入一小巷轉數曲忽有兒戲于門側視驢連呼曰驢歸驢歸盜者聞之欣  
然出視遂擒之 高祖登極後乾祐為廣順是年兗州慕容彥超反高祖親征城將破忽夜夢一  
人狀貌甚偉異被王者之服謂高祖曰陛下明日當得城及覺天猶未曉高祖私謂徵兆如此可  
不預備乎于是躬督將士戮力急攻至午而城陷車駕將入有司請由生方鳴鞭而進遂取別巷  
轉數曲見一處門牆甚高大問之云夫子廟高祖意豁然謂近臣曰寡人所夢得非夫子乎不然  
何取路于此也因下馬觀之方升堂觀其聖像一如夢中所見者于是大喜叩首再拜近臣或諫  
以為天子不合拜異世陪臣高祖曰夫子聖人也百王取則而又夢告寡人得非夫子幽贊所及  
耶安得不拜仍以廟側數十家為灑掃戶命孔氏襲文宣王者長為本縣令慕容彥超之被圍也  
乘城而望見高祖親臨矢石其勢不可當退而憂之因勉其麾下曰汝等宜為吾盡命吾虛中金  
銀如山積若全此城吾盡以為賜汝等勿患富貴頃之有卒私言曰我知侍中銀皆鐵胎得之何  
用于是諸軍聞之稍稍解體未幾城陷及高祖之人也有司閱其庫藏其間銀鐵胎者果十有七  
八初彥超常令人開質庫有以鐵胎銀質錢者經年後庫吏始覺遂言之于彥超初甚怒頃之謂  
吏曰此易致耳汝宜偽劄庫牘凡金銀器用暨縑帛等速皆藏匿仍亂撤其餘以為賂賂後申明  
吾當擒此輩矣庫吏如其教于是彥超下令曰吾為使長茂百姓而又不謹遭時劄去其過深矣  
今恐百姓疑彥超隱其物宜令三月內各投狀明言物色自當賠償之不爾者有過百姓以為  
然于是投狀相繼翌日鐵胎銀主果出于彥超之置之深屋中使教部曲輩晝夜造用廣府庫此銀是也

閻宏魯者後唐邢州節度使寶之子也寶唐書有傳宏魯事唐明  
宗晉高祖累歷事任家本魯中洎告疾歸里慕容彥超初臨禮待  
極厚及謀大逆以宏魯子希俊為鎮寧軍節度副使在世宗幕下

而惡之聞朝廷出兵隄防即責宏魯曰爾教兒捍我于朝將覆吾族耶故罹其禍崔周度者父光表舉進士科甲盧質節制橫海辟為支使周度有文學起家長蘆令登朝歷監察御史右補闕以家在齊州欲謀葬事懇求外任除泰寧軍節度判官而性剛烈又以嘗為諫官觀凶帥之不法不忍坐視其樊因極言以諫彥超故及斯禍太祖平兗州詔曰問宏魯崔周度義死之臣禮加二等所以滲漏澤而責黃泉也爾等貞節昭彰正容肅厲以從順為己任以立義作身謀履此禍機併惟冤橫宜伸贈典以慰貞魂宏魯可贈左驍衛大將軍周度可贈祕書少監

永樂大典卷八千八百二

舊五代史卷一百三十

舊五代史卷一百三十攷證

周列傳十王峻傳又奏請以顏愆陳觀代范質李穀為相 案顏

愆陳觀歐陽史作顏衍陳周

未幾死于貶所時廣順三年三月也 案五代春秋作三月誅王峻與是書異

舊五代史卷一百三十攷證

舊五代史

卷一百三十

攷證

舊五代史卷一百三十一

宋薛居正等撰

周書第二十二

列傳十一

劉暉字克明晉丞相譙國公昫之弟也昫晉書有傳暉少離鄉里唐天祐中梁將劉鄩襲太原軍至樂平時暉客于縣舍爲鄩軍所俘謝彥章見之知其儒者待之以禮謂其鄉人劉去非曰爲君得一宗人卽令暉見之去非詢其爵里乃親族也對泣久之自是隨去非客于彥章門下彥章得罪去非爲郢州刺史暉隨之郡莊宗平河洛去非以嘗從劉守奇歸梁深懼獲罪乃棄郡投高季興于荆南暉累爲荊州攝官旣而兄昫明宗朝爲學士遣人召歸梁漢賊鎮鄧州辟爲從事入爲監察御史歷水部員外郎史館修撰長



興末宰臣趙鳳鎮邢臺表爲節度判官清泰初入爲起居郎改駕部員外郎兼侍御史知雜事移河南少尹兵部郎中轉太府卿漢祖受命用爲宗正卿周初改衛尉卿廣順元年冬十月稅居于東京夜夢鬼詫之曰公于我塚土安牀深不奉益暎問鬼姓氏曰李丕文暎曰君言殊誤都城內豈可塚耶曰塚本在野張十八郎展城時圍入忽寤又半月復夢前鬼曰公不相信屈觀吾舍可乎卽以手掎地豁然見華策花木叢萃房廊雕煥立暎于西廡久之見一團火如電前來漸近卽前鬼也引暎深入出其孥泣拜如有所託暎問丕文鬼事曰冥司各有部屬外不知也暎曰余官何至再三不對苦訛之曰齊王判官暎曰張令公爲齊王去世久矣今鄆州高令公爲齊王余方爲列卿豈復爲賓佐乎鬼曰不知也暎旣寤欲掘而視之旣而又告同僚曰鬼雖見訴其如吾公舍何乃止

廣順二年春朝廷以暎爲高麗冊使三月至鄆節度使高行周以

暎嗜酒留連累日且夕沈醉其月二十三日晨興櫛髮狀如醉寐

男泳視之已卒矣

太平廣記錄衛命使吳越路由鄆州卒于郵亭

時年六十一其年八月鄆帥齊

王高行周亦夢請齊王判官得無是乎暎從儒學好聚書嗜酒無儀檢然衷抱無他急于行義士友以此多之

永泰大典卷九十九

張沆字太玄徐州人父嚴本州牙將沆少力學攻詞賦登進士第

唐明宗子秦王好文然童年疎率動不由禮每賓僚大集手自出

題令面前賦詩少不如意則壞裂抵棄沆初以刺謁秦王屬合座

客各爲南湖廳記因謂沆曰聞生名久矣請爲此文沆不獲已從

之及羣士記成獨取沆所爲勒之于石繇是署爲河南府巡官秦

王敗勒歸鄉里晉初桑維翰秉政沆以文干進用爲著作佐郎集

賢校理遷右拾遺維翰出鎮奏爲記室從維翰入朝授殿中侍御

史歲餘自侍御史改祠部員外郎知制誥召入翰林爲學士維翰罷相馮玉用事不欲沈居禁密改右諫議大夫罷其職漢祖至汴轉右常侍復用爲學士未幾遷工部尙書充職明年以營奉葬事求解職改禮部尙書及歸朝復爲學士太祖以沈耳疾罷職改刑部尙書廣順二年秋命爲故齊王高行周冊贈使復命而卒贈太子少保沈性儒雅好釋氏雖久居祿位家無餘財死之日圖書之外唯使鄆之貲耳嗣子尙幼親友慮其耗散上言于太祖乃令三司差人主葬餘資市邸舍以贍其孤焉沈記覽文史好徵求僻事公家應用時出一聯以炫奇筆故不爲馮玉所重雖有瞶疾猶出入金門凡五六年漢隱帝末年楊史遇害翌日沈方知之聽猶未審忽問同僚曰竊聞盜殺史公其盜獲否是時京師恟懼之次聞者笑之有士人申光遜者與沈友善沈未病時夢沈手出小佛塔

示光遜視其上有詩十四字云今生不見故人面明月高高上翠

樓光遜既寤心惡之俄聞沈卒

永樂大典卷八十三萬五千

張可復字伯恭德州平原人也父達累贈戶部侍郎可復畧通儒術少習吏事梁末薄遊于魏鄴王羅紹威表爲安陽簿唐天成初依晉公霍彥威于青州爲從事晉公以其滑稽好避事目爲姦兒長興中入朝拜監察御史六遷至兵部郎中賜金紫晉天福中自西京留守判官入爲祕書少監改佐司郎中開運中遷左諫議大夫漢乾祐初湘陰公鎮徐方朝行中選可以從戎者因授武寧軍節度副使檢校禮部尙書及世宗鎮澶淵改鎮寧軍節度行軍司馬三年徵拜給事中世宗嗣位以澶淵幕府之舊拜右散騎常侍顯德元年秋以疾卒年七十有三制贈戶部尙書可復無他才惟以謹愿保長年加之迂懦多爲同列清俊者所侮而累階至金

紫居三品之秩亦其命耶

宋史卷之六十三

于德辰字進明元城人也幼敏悟篤志好學及射策文場數上不調後唐明宗鎮邢州德辰往謁焉明宗見而器之因得假官于屬邑後繼歷州縣歷仕晉漢周官至工部尚書

宋史卷之三十一

王延字世美鄭州長豐人也少爲儒善詞賦會鄉曲離亂不獲從鄉薦因客于浮陽隨滄帥戴思遠入梁嘗以所爲賦謁梁相李琪琪覽之欣然曰此道近難其人王生升我堂矣繇是人士稱之尋薦爲卽墨縣令歷徐宋鄆青四鎮從事長興初鄉人馮道趙鳳在相位擢拜左補闕踰年以水部員外郎知制誥遷中書舍人賜金紫清泰末以本官權知貢舉時有舉子崔頌者故相協之子也協素與吏部尚書盧文紀不睦及延將入貢院文紀謂延曰舍人以謹重聞于時所以去冬老夫在相位時與諸相首以長者聞奏用

掌文衡然貢闈取士頗多面目說者云越人善泅生子方晬乳母浮之水上或駭然止之乳母曰其父善泅子必無溺今若以名下取士卽此類也舍人當求實才以副公望延退而謂人曰盧公之言蓋爲崔頌也縱與其父不悅致意何至此耶來春以頌登甲科其年改御史中丞歲滿轉尚書右丞奉使兩浙吳人深重之復命授吏部侍郎改尚書左丞拜太常卿歷工禮刑三尚書周初以疾求分司西洛授太子少保旣而連月請告爲留臺所糾改少傅致仕廣順二年冬卒時年七十有三子億仕皇朝爲殿中丞

宋史卷之三十一

申文炳字國華洛陽人也父鄂唐左千牛衛將軍文炳長興中進

士擢策釋褐中正軍節度推官歷孟懷支使鄆城陝縣二邑宰自

澶州觀察判官入爲右補闕晉開運初授虞部員外郎知制誥轉

金部郎中充職廣順中爲學士遷中書舍人知貢舉

玉壺清話李慶願德中舉進士工詩

有云醉輕浮世事老重故鄉人樞密王朴以此一聯薦于申文炳文炳知真舉遂為第三人 顯德五年秋以疾解職授左散騎常侍六年秋卒于家時年五十五文炳為文典雅有訓誥之風執性紆緩待搢紳以禮中年而卒皆惜之 宋史大傳卷二十九百三十一

扈載少好學善屬文賦頌碑贊尤其所長廣順初隨計于禮部文價為一時之最是歲升高等載因遊相國寺見庭竹可愛作碧鮮賦題其壁世宗聞之遣小黃門就壁錄之覽而稱善因拜水部員外郎知制誥遷翰林學士賜緋 宋史李穀傳扈載以文章馳名樞密使王朴薦令知制誥除書未及朴請中書言之穀曰斯人命薄

外郎知制誥遷翰林學士賜緋 宋史李穀傳扈載以文章馳名樞密使王朴薦令知制誥除書未及朴請中書言之穀曰斯人命薄

日乃力疾入直學士院世宗憐之賜誥還第遣太醫視疾年三十有六卒載始自解褐至終纔四年而與劉哀皆有才無命時論惜之 宋史大傳卷二十九百三十一

劉哀彭城人神爽氣俊富有文藻繇進士第任左拾遺與扈載齊

各年二十八而卒

宋史大傳卷二十九百三十一

賈緯真定獲鹿人也 宋祁景文集賈公孫墓誌銘賈氏自唐司空魏國公耽世貫滄州南皮子孫稍稍徙居真定五世祖諒高祖瑾曾祖處士諱初有至性疾世方亂守鄉里不肯事四方祖諱緯 少苦學為文唐末舉進士不第遇亂歸河朔本府累

署參軍邑宰唐天成中范延光鎮定州表授趙州軍事判官遷石邑縣令緯屬文之外勤于撰述以唐代諸帝實錄自武宗以下闕而不紀乃採掇近代傳聞之事及諸家小說第其年月編為唐年

補錄凡六十五卷識者賞之 景文集緯博學善詞章論議明銳一時諸儒皆屈唐自武宗後史錄亡散君掇拾殘餘為唐年補錄數十萬言

負銳于編述不樂曲臺之任乃陳情于相座又與監修國史趙瑩

詩曰滿朝唯我相秉柄無親讐三年司大董最切是編修史才不易得勤勤處處求愚從年始立東觀思優游昔時人未許今來虛

白頭春臺與秋閣往往興歸愁信運北闕下不繫如虛舟綿繆非

仍不三

仍不三

仍不三

仍不三

所好一日疑三秋何當適所願便如昇瀛洲未幾轉屯田員外郎改起居郎史館修撰又謂瑩曰唐史一百三十卷止于代宗已下十餘朝未有正史請與同職修之瑩以其言上奏晉祖然之謂李崧曰賈緯欲修唐史如何對曰臣每見史官輩言唐朝近百年來無實錄既無根本安能編紀緯聞崧言頗怒面責崧沮已崧曰與公鄉人理須相惜此事非細安敢輕言緯與宰臣論說不已明年春敕修唐史緯在籍中月餘丁內艱歸真定開運初服闋復起居郎修撰如故尋以本官知制誥緯長于記注應用文筆未能過人而議論剛強儕類不平之因目之爲賈鐵嘴開運中累遷中書舍人契丹入京師隨契丹至真定後與公卿還朝授左諫議大夫緯以久次綸閣比望丞郎之拜及遷諫署缺望彌甚蘇逢吉監修國史以緯頻投文字甚知之尋充史館修撰判館事乾祐中受詔與

王仲寶儼修漢高祖實錄緯以筆削爲己任然而褒貶之際憎愛任情晉相桑維翰執政日薄緯之爲人不甚見禮緯深銜之及敘維翰傳身沒之後有白金八千錠他物稱是翰林學士徐台符緯邑人也與緯相善謂緯曰竊聞吾友書桑魏公白金之數不亦多乎但以十日所覩不可厚誣緯不得已改爲白金數千錠緯以撰述之勞每詣宰執懇祈遷轉遇內難不果太祖卽位改給事中判館如故先是賈貞固奏請修晉朝實錄既竟亦望陞擢貞固猶在相位乃上疏抗論除拜不平旣而以所撰日歷示監修王峻皆媒孽貞固及蘇禹珪之短歷詆朝士之先達者峻惡之謂同列曰賈給事家有士子亦要門閥無玷今滿朝並遭非毀教士子何以進身乃于太祖前言之出爲平盧軍行軍司馬時符彥卿鎮青州以緯文士厚禮之緯妻以緯左遷駭惋傷離病留于京緯書候之目

勉醫藥來春與子同歸獲鹿廣順二年春緯卒及訃至妻一慟而終果雙柩北歸聞者歎之緯有集三十卷目曰草堂集並所撰唐年補錄六十五卷皆傳于世

宋史卷一百一十七

趙延又字子英秦州人曾祖省躬以明術數為通州司馬遇亂避地于蜀祖師古黔中經畧判官父温珪仕蜀為司天監温珪長于袁許之術兼之推步王建時深蒙寵待延問得失事微差跌即被詰讓臨終謂其子曰技術雖是世業吾仕蜀已來幾由技術而死爾輩能以他途致身亦良圖也延又少以家法仕蜀由廕為奉禮部翰林待詔蜀亡入洛時年三十天成中得蜀舊職延又世為星官兼通三式尤長于袁許之鑿清泰中嘗與樞密直學士呂琦並宿于內庭琦因從容密問國家運祚延又曰來年厄會之期俟過別論琦訊之不已延又曰保邦在刑政保祚在福德在刑政則術

竹本托

竹本子同

郭下居化麻谷今改云

士不敢言奈際會諸公罕有卓絕福德者下官實有恤緯之僭其年兼衛尉少卿晉天福中代馬重績為司天監契丹入京師隨至鎮州時契丹滿達勒為帥會漢高祖定兩京控鶴都將李筠與諸校密謀劫庫兵逐契丹猶豫未決謀于延又因假以術數贊成之契丹既去還京師官秩如舊廣順初加檢校司徒本官如故太祖數召對焉歐陽史周太祖自魏以兵入京師召延又問漢祚短促者天數耶延又言王者撫天下當以仁恩德澤而漢淫酷刑法枉濫天下稱冤此其所以亡也是時太祖方以兵圍蘇達吉劉錫第欲誅其族聞延又言悚然因貸其族二家獲全延又善交遊達機變兼有技術見者歡心二年授太府卿判司天監事其年夏初火犯靈臺延又自言星官所忌又言身命宮灾併未幾其子卒尋又妻卒俄而延又嬰疾故人省之舉手曰多謝諸親死灾不可追也尋卒年五十八贈光祿卿

宋史卷一百一十九

沈邁字期遠睢陽人也父振貝州永濟令累贈左諫議大夫邁幼

沈邁字期遠

宋史卷一百一十九

孤以苦學為志弱冠登進士第釋褐除校書郎由御史臺主簿拜  
 監察御史凡五遷至金部郎中充三司判官廣順中以本官知制  
 誥世宗嗣位擢為翰林院學士歲滿拜中書舍人充職顯德三年  
 夏扈從南征遇疾歸及京而卒遣為人謙和勤于接下每文士投  
 贄必擇其賢者而譽之故當時後進之士多歸焉亦宋大典卷一百二十日  
 李知損字化機大梁人也少輕薄利口無行梁朝時以牒刺篇詠  
 出入于內臣之門由是浪得虛譽時人目之為李羅隱累為藩鎮  
 從事入拜左補闕歷刑兵二部員外郎度支判官右司郎中坐受  
 推鹽使王景遇厚賂謫于均州漢初歸朝除右司郎中兼侍御史  
 知雜事廣順中拜右諫議大夫時王峻為樞密使知損以與峻有  
 舊遂詣峻求使于江浙峻為上言太祖素聞知損所為甚難之峻  
 曰此人如或辱命譴之可也太祖重違其請遂可之知損既受命

知損有  
 原列於四

大恣其荒誕之意遂假資于人廣備行李及即路所經州郡無不  
 強貸又移書于青州符彥卿借錢百萬及在郵亭行止穢雜王峻  
 聞而奏之乃責授棣州司馬世宗即位切于求人素聞知損狂狷  
 好上封事謂有可采且欲聞外事即命徵還還與復資數月之間  
 日貢章疏多斥譴貴近自謀進取又上章求為過海使世宗因發  
 怒仍以其醜行日彰故命除名配沙門島知損將行謂所親曰余  
 嘗遇善相者言我三逐之後當居相位余自此而三矣子姑待我  
 後歲餘卒于海中其庸誕也如此五代史補李知損自至諫議大夫好輕薄時人謂之李羅隱至于親友間往往還簡牘往往引里

巷常談謂之偶對常有朝士奉使回以土物為贈其意猶望卻回知損覺之且貽書謝之曰在小  
 子一時間卻擬送去恐大官兩羅裏更不將來乾祐中奉使鄭州時宋彥筠為節度彥筠小字忙  
 兒因宴會彥筠酒酣輒問曰眾人何為號足下為羅隱對曰下官平素好為詩其格致大抵如羅  
 隱故人為號彥筠曰不然蓋為足下輕薄如羅隱耳知損大怒厲聲曰只令公人皆謂之宋忙兒  
 未必便能放  
 牛滿座皆笑

孫晟本名鳳

南唐書云孫晟高密人一  
 名鳳又名晟少舉進士

性陰賊好好謀少為道士工詩于

與薛史微有詳畧皆言嚴因朱守  
嚴事守事連而止命也亦有唐書則云  
天賦中而高華同奉秦王從禁  
行禁賦志之今正陽志及後漢  
帝志云魏其以休果觀之志不  
許帝則故也思亂進者乃捨去  
又以嚴為秦王負而亦亡也而五  
史史果

廬山簡寂觀畫唐詩人賈島像懸于屋壁以禮事之觀主以為妖  
妄執杖驅出之大為時輩所嗤改儒服謁唐莊宗于鎮州授祕書  
省著作佐郎南唐書云豆盧革為相雅知忌辟為判官天成初朱守殷據夷門叛時晟為幕  
賓贊成其事是時晟常擐甲露刃以十數騎自隨巡行于市多所  
屠害汴人為之切齒城陷朱氏被誅晟乃匿跡更名棄其妻子亡  
命于陳宋間歐陽史云安重誨惡晟以為教守殷反者晟也畫其像購之不可得遂族其家晟奔于吳會同惡者送之過淮  
吳人方納叛亡即以偽官授之晟亦微有詞翰李昇偽尊楊浦為  
讓皇之冊文即晟之詞也故江南尤重之二十年間累歷偽任財  
貨邸第頗適其意晟以家妓其眾每食不設食几令眾妓各執一  
食器用侍于其側謂之內臺盤其自養稱愜也如是南唐書曰為舒州節度使治軍嚴有歸化卒二人正晝挺白刃入府求晟殺之入自西門吏士倉卒莫能禦適忌間行在東顯德三  
年春王師下廣陵江左驚窘李景偽署晟為司空令奉貢于行在

鈔本已耳

世宗遣右常侍劉悅伴之賜與甚厚泊隨駕到闕舍于都亭驛禮  
遇殊優每召見飲之醇醴問以江南事晟但言吳畏陛下之神武  
唯以北面為求保無二也先是張永德守下蔡素與李重進不協  
每宴將校多暴其短一日永德乘醉乃大言重進潛蓄奸謀當時  
將校無不驚駭絛是人情大擾後密遣親信乘驛上言世宗不聽  
亦不介意一日重進自壽陽去其部從直詣永德帳下宴飲終日  
而去自此人情稍安時李景覘而知之因密令人賫蠟書遣重進  
勸為不軌重進以其蠟書進呈世宗覽之皆斥譴反間之言世宗  
怒晟前言失實因急召侍衛都虞候韓通令收晟下獄與其從者  
百餘人皆誅之南唐書云世祖命都承旨曹翰護至右軍巡院猶飲之酒數酌翰起曰相者一百人亦皆誅公得罪賜自盡思怕然整衣索笏東南望再拜曰臣受恩深謹以死謝從  
昔構禍于梁氏今伏法于梁獄報應之道豈徒然哉晟性慷慨常

唐書

卷一百一十一

七



感李景之厚遇誓死以報之錄立談云晟將命周朝自知不免私謂副使王崇質曰吾思之熟矣終不忍負永陵一坏土餘非所知也及將下獄世宗令近臣問以江南可取之狀晟默然不對臨刑之際整其衣冠南望金陵再拜而言曰臣惟以死謝遂伏誅永崇大史夫三千五十一

是方尚於邵二雲氏受獲兒括奉令觀此在于

孔浩谷戶部交固者丁酉八月廿一吳宗危

照錄原跋末一字未詳

舊五代史卷一百三十一

廿八日

舊五代史卷一百三十一攷證

周列傳十一王延傳改少傳致仕 案歐陽史作以太子少保致仕

賈緯傳開運中累遷中書舍人 案王珪華陽集賈文元墓誌銘作曾祖緯晉中書舍人宋史賈昌朝傳因之然緯實終于周非終于晉也宋祁景文集文作漢周間中書舍人據此傳緯仕漢周末嘗再為舍人疑景文集誤

趙延義傳 案歐陽史作趙延義

孫晟傳朱氏被誅晟乃匿跡更名棄其妻子亡命于陳宋間 案孫晟一名忌南唐書云天成中與高輦同事秦王從榮從榮敗忌亡命至正陽未及渡追騎奄至疑其狀偉異睨之忌不顧坐淮岸捫敝衣齧虱追者乃捨去是以晟為秦王賓客而出亡也

與是書異歐陽史從是書

滿達勒舊作麻答今改

舊五代史卷一百三十一攷證

